



Republika e Kosovës
Republika Kosova
Republic of Kosovo



Komuna e Vitisë
Opstina Vitina
Municipality of Viti/na

PROCESVERBAL

IMBLEDHJES SË PESTË TË KUVENDIT TË KOMUNËS SË VITISË

Mbledhjen e ftoi kryetari, z.Bekim Azizi, kryesues i seancës së Kuvendit Komunal. Mbledhja është mbajtur më 30.04.2026 (e enjte), në shtëpinë e kulturës “Gursel e Bajram Sylejmani”, duke filluar punën në orën 10:00. Në mbledhje morën pjesë kryesuesi i Kuvendit, z.Bekim Azizi, nënkryetari i komunës, z.Hasan Aliu, drejtorët komunalë, mediat elektronike, si dhe këshilltarët e Kuvendit: z.Basri Aliu, z.Ramadan Deliu, zn.Zejnepe Osmani, z.Illir Zuka, z.Ekrem Ymeri, z.Sokol Shaqiri, z.Faruk Shabani, znj.Yllka Qamili, zn.Djellza Fejzullahu, z.Bekim Azizi, z.Hajdin Ademi, z.Visar Demiri, z.Nuhi Ramadani, z.Selim Sejdiu, znj.Elsa Jahija, znj.Ardita Hajdari, zn.Mirjeta Hamiti, z.Jakup Demiri, zn.Lindita Demelezi, zn.Majlinda Shabani, z.Ekrem Abazi, z.Lulzim Haxhiu, zn.Liridona Bislmi dhe z.Remzi Salihu, z.Elham Emërllahu, ndërsa munguan z.Bekim Rama dhe z.Labinot Bislmi.

Kryesuesi i Kuvendit, Bekim Azizi: Mirëdita dhe mirë se keni ardhur në seancën e pestë të rregullt. Përshëndetje për të gjithë të pranishmit që janë në këtë seancë. Kjo është seanca e pestë e Kuvendit Komunal të këtij mandati. Materialin e keni marrë me kohë për këtë seancë dhe, pak para se të fillojmë këtë pjesë, po ju njoftoj se kemi pranuar konfirmimin e ligjshmërisë për një vendim, ndërsa për të tjerat ende jo. E kam një kërkesë nga Demos, që i përcjell kuvendet komunale. Ma kanë dërguar një email për të kërkuar miratimin tuaj që t'i përcjellin aktivitetet e Kuvendit Komunal. A jeni për këtë? Të gjithë u pajtuan që t'i përcjellin aktivitetet e Kuvendit. Para se të vazhdojmë me rendin e ditës, e kemi edhe një pikë shtesë, të cilën e kemi diskutuar në KPF, për dhënien në shfrytëzim të pronës KEDS-it. Vazhdimisht këto kërkesa nuk i kemi penguar. Ky është propozim-vendim për dhënien në shfrytëzim të pronës së paluajtshme të komunës Kompanisë Kosovare për Distributim dhe Furnizim me Energji Elektrike sh.a. (KEDS) në Viti, për vendosjen e trafave elektrike. Kjo është pikë shtesë e rendit të ditës.

z.Hasan Aliu, nënkryetar i Komunës: Përshëndetje të nderuar të pranishëm. Liridona e ka ngritur këtë çështje disa herë. Unë kam pasur një takim me përfaqësuesit e KEDS-it dhe, si kushtëzim, ndoshta e kam trajtuar çështjen e trafos në Drobesh. Në rast se ne, si Kuvend Komunal dhe si ekzekutiv, jemi në gjendje t'i kryejmë procedurat edhe në mënyrë të përshpejtuar për KEDS-in, krejt kjo është me qëllim që t'u ofrojmë shërbime qytetarëve të komunës së Vitisë. Prandaj e kam theksuar edhe çështjen e trafos në Drobesh, që edhe ajo çështje të marrë përshpejtim dhe sa më shpejt të ngrihet një trafo aty në Drobesh, në mënyrë që të gjendet zgjidhje edhe për qytetarët e Drobeshit. Këtë e kanë marrë shumë seriozisht edhe drejtori i KEDS-it.

Kryesuesi i Kuvendit, Bekim Azizi: Edhe në Ramjan ka qenë një. Besoj që edhe për këtë ke bisedu për pikat e caktume të rendit të ditës. A ka dikush me diskutu?

z.Basri Aliu: Ne si grup parlamentar jemi pro edhe kësaj pike shtesë të rendit të ditës. Po ashtu, edhe unë po e shfrytëzoj rastin për fshatin Skifteraj, sepse atje vetëm është planifikuar rrjetëzimi të kjo rruga kryesore ku është shkolla. Të bëhet një presion më i madh te kompania që të kryhet edhe ajo.

Kryesuesi i Kuvendit, Bekim Azizi: A jeni që në rendin e ditës të hyjë edhe kjo pikë shtesë? Kush është për? A jeni që të miratohet rendi i ditës komplet me pikat që e keni marrë materialin? Nga të gjithë u miratua rendi i ditës.

R e n d d i t e

1. Shqyrtimi dhe miratimi i procesverbalit të mbledhjes së katër të Kuvendit Komunal.
2. Pasqyrat Financiare të Buxhetit Komunal për periudhën janar-mars 2026.
3. Propozim për shqyrtimin dhe miratimin e propozim vendimit për nisjen e procedurave për themelimin e ndërmarrjes publike lokale (NPL) në Komunën e Vitisë.
4. Propozim për shqyrtimin dhe miratimin e propozim vendimit për ndarjen e parcelës kadastrale të pronës komunale.
5. Propozim për shqyrtimin dhe miratimin e propozim vendimit për transferin (Rialokimin) e mjeteve buxhetore në programin buxhetor në kategorinë ekonomike të investimeve kapitale.
6. Propozim për shqyrtimin dhe miratimin e propozim vendimit për kthimin e mjeteve buxhetore në kategorinë ekonomike të investimeve kapitale.
7. Pyetje dhe përgjigje.

Si pikë e parë e rendit të ditës:

1. Shqyrtimi dhe miratimi i procesverbalit të mbledhjes së katër të Kuvendit Komunal

Kryesuesi i Kuvendit, Bekim Azizi: A jeni që të miratohet procesverbali? Pra, nga të gjithë të pranishmit me vota pro, pa asnjë votë kundër, asnjë abstenim, miratohet procesverbali.

Si pikë e dytë e rendit të ditës:

2. Pasqyrat Financiare të buxhetit Komunal për periudhën janar-mars 2026

z.Berat Zuka, zyrtar financiar: Përshëndetje të nderuar të pranishëm. Pasqyrat financiare të buxhetit komunal për periudhën janar–mars 2026. Ne, me kohë si Zyrë e Buxhetit kemi përgatitur raportin financiar për këtë tremujor, dhe po mundohem t’i paraqes në pika të shkurtra, sepse materialin e keni marrë. Pjesën e parë, në faqen dy, e keni buxhetin e aprovuar, i cili është buxheti vjetor, kurse në pjesën e dytë e keni buxhetin e alokuar. Nga buxheti i alokuar është shuma në vlerë prej 7,991,162.97. Totali i alokimeve në paga janë alokuar 6,811,819 nga granti qeveritar, nga të hyrat vetanake janë alokuar 123,252.32, dhe nga donacionet që janë bartur nga viti i kaluar 164,080. Materialin e keni marrë me kohë. Për pyetje shtesë jam në dispozicionin tuaj.

z.Bekim Azizi, kryesues i Kuvendit: Hapi diskutimin për këtë pikë.

znj.Liridona Bislimi: Përshëndetje të nderuar të pranishëm, i nderuar nënkryetar. Sa u përket pasqyrave financiare janar–mars 2026, fillimisht po dua me theksu se prej materialit që e kemi pranuar, ku e kemi bërë edhe një diskutim në KPF, na ka bërë me e kuptu se këto pasqyra nuk janë vetëm një analizë e thjeshtë teknike, por janë një pasqyrë e drejtpërdrejtë e mënyrës se si po menaxhohen paratë publike të qytetarëve tanë. Këtë mundet me e arrit secili, tu i zbërthij shumë thjesht, duke i krahasuar pasqyrat financiare të tremujorit të parë të vitit 2026 me të njëjtën periudhë të vitit 2025. Aty shihet qartë se kemi një rritje të përgjithshme të shpenzimeve, me një dallim prej rreth 450 mijë euro më shumë. E ajo që është edhe më shqetësuese është fakti se, në të njëjtën kohë, kemi rënie të të hyrave vetanake. Kjo do të thotë se kemi më pak të hyra dhe më shumë shpenzime. Të nderuar, kur e bëjmë analizën dhe hyjmë në detaje, bëhet edhe më e qartë se ku qëndron problemi. Në bazë të këtij materiali që e kemi analizuar, i bie që rritja e shpenzimeve nga Komuna e Vitisë nuk vjen nga ndonjë zhvillim i madh apo projekte që prekin drejtpërdrejt jetën e qytetarëve, por kryesisht nga shpenzimet operative dhe administrative. Po jap vetëm disa shembuj më konkretisht: Shpenzimet për dreka zyrtare kanë qenë rreth 8,400 euro në vitin 2025, ndërsa në vitin 2026 kanë arritur në 10,709 euro. Pra, kemi rritje prej rreth 27%, për periudhën e njëjtë, vetëm dallojnë vitet; Shpenzimet për informim publik dhe media kanë qenë rreth 3,800 euro në vitin 2025, ndërsa në vitin 2026 janë rritur në 4,500 euro. Pra, rritje prej rreth 18%; Për mirëmbajtje të objekteve, në vitin 2025 janë shpenzuar rreth 70 mijë euro, ndërsa në vitin 2026 mbi 103 mijë euro. Është kodi i njëjtë buxhetor, periudha e njëjtë, vetëm dallojnë mjetet. Kjo është rritje prej mbi 30 mijë euro, apo rreth 47% dallueshmëri; Për mirëmbajtje të rrugëve, në Komunën e Vitisë janë shpenzuar rreth 80 mijë euro për periudhën janar–mars të vitit 2025, ndërsa kemi rritje në mbi 106 mijë euro në vitin 2026. Po flasim për periudhën janar–mars, kur nuk kemi pasur reshje, nuk janë shtu rrugët në Komunën e Vitisë, por vetëm janë shtu mjetet, që janë diku rreth 26 mijë euro më shumë; Riparimi i automjeteve ka kushtuar rreth 15 mijë euro, e tash mbi 19 mijë

euro; Të gjitha këto tregojnë një gjë shumë të qartë: rritja e buxhetit po shkon drejt shpenzimeve operative dhe administrative. Ndërkohë, investimet kapitale, që në vitin 2025 ishin planifikuar rreth 2.66 milionë euro, ndërsa për vitin 2026 nuk po realizohen në nivelin e njëjtë me planifikimin, domethënë i kemi rreth 2.04 milionë euro. Pra, po i bie që ju po planifikoni më shumë, por po realizoni më pak. Kemi edhe kode të tjera buxhetore të shumta, por nuk po dua me vazhdu më tutje. Besoj që do t'i marr këto përgjigje e mandej e hapim diskutimin. Edhe pyetja kryesore, në diskutimet që i kam bërë haptas me qytetarë, është se si ka ardhur deri te kjo dallueshmëri kaq e madhe në përqindje të këto kode buxhetore për periudhën e njëjtë. Edhe unë personalisht konsideroj që është e domosdoshme të rishikohen prioritetet. Me një fjalë, me pas më pak shpenzime për administratën, e sidomos për Zyrën e Kryetarit, dhe me pas më shumë investime reale, sepse, nëse vazhdojmë me këtë trend, duke filluar vetëm me tremujorin e parë, po ku e kemi komplet vitin që kemi me ardhë me zhvillime kapitale. Nëse shkojmë kështu, kemi me përfundu me një buxhet që vetëm ka rritje në shifra, mirëpo rezultat konkret nuk kemi me mujt me pas.

z.Basri Aliu: Në emër të grupit parlamentar do të jap një kontribut sado pak, pasi që edhe në KPF kemi diskutuar këtë pikë dhe janë sqaruar shumë sende aty. E dimë se këto pasqyra paraqesin vetëm një shpenzim, asgjë tjetër. Ky shpenzim realisht nuk krahasohet me periudhën e këtij viti me vitin e kaluar. Arsyeja pse nuk krahasohet është se, duke e ditur që në vitin e kaluar thesari i ka tërhequr shumë mjete komunës për shkak të kontratës kolektive, komuna nuk ka qenë në gjendje t'i paguajë obligimet që i ka pasur gjatë vitit 2025. Andaj, duke e ditur se këtë vit duhet t'i kryejë obligimet paraprake, këto shpenzime janë faktikisht shpenzime të vitit të kaluar, nuk janë të kësaj periudhe. Një pjesë janë të kësaj periudhe, por shumica janë mjete të vitit të kaluar. Duhet me pasë parasysh se të gjitha komunat e Kosovës kanë probleme të kësaj natyre.

znj.Majlinda Shabani: Përshëndetje të nderuar të pranishëm. Kryetarin e komunës nuk e kemi prezent dhe gati nuk po e kemi në asnjë seancë, e pramë ish dalë në një televizion tu fol për tema qendrore. E ka harru që qytetarët e kanë votu për qeverisje lokale e jo qendrore. Respekt shumë për nënkryetarin që e kemi këtu, që është prezent në çdo seancë. Pasqyrat financiare janar–mars 2026 për Komunën e Vitisë realisht edhe ky raport tregon një realitet të asaj që ne si opozitë e kemi thënë vazhdimisht: mungesë transparence, keqplanifikim dhe keqmenaxhim të parasë publike. Kjo qeverisje nuk është transparente. Përkundrazi, ka shumë dyshime për mënyrën se si po shpenzohen taksat e qytetarëve. Për ta thënë ndryshe, kjo qeverisje është edhe përplot abuzime në kurriz të qytetarëve. Dhe pikërisht këtu qëndron problemi ynë më i madh te paratë e qytetarëve, se si po harxhohen dhe ku po shkojnë. Shkalla e realizimit, duke u bazuar në planifikimin tremujor, është 57.01%, ndërsa shkalla e realizimit, duke u bazuar në planifikimin vjetor, është vetëm 14.25%. Te lejet e ndërtimit janë planifikuar 25 mijë euro, ndërsa të hyrat janë vetëm 30 euro, domethënë 0.12%. A do të thotë që kemi ndërtime pa leje? A doni me pranë ju vetë se kjo është bërë edhe çështje mediatike? Nëse e krahasojmë këtë me tremujorin e vitit paraprak, e ki vlerën 1,680 euro që ka pasur të hyra, ndërsa për këtë periudhë vetëm 30 euro janë të hyrat. Para se të kaloj te investimet kapitale apo prezantimi analitik i investimeve, po vazhdoj të bëj pyetje dhe kërkesë për sqarime të disa kode buxhetore. Kodi 13440 – Shërbime këshilldhënëse dhe profesionale. Për këtë tremujor i kemi 186,592 euro dhe, nëse e krahasojmë me vitin paraprak, ka rritje diku për 100 mijë euro. Shërbimet këshilldhënëse dhe profesionale janë temë që unë i kam diskutuar edhe më herët. Nuk keni dhënë sqarime as edhe një herë se çka janë tu i shërby këto shërbime këshilldhënëse dhe profesionale Komunës së Vitisë. Për çdo vit ka pasur rritje, ndërsa për këtë tremujor ka rritje diku për 100 mijë euro. Përpos kësaj, i kemi edhe shërbime të ndryshme shëndetësore. E dimë kontratat që janë me Caritas-in dhe Kosova Med-in dhe shërbimet tjera konsulente. Domethënë i keni gati 1 milion euro, me e krahasu me komplet vitin, që Komuna e Vitisë i jep për këto shërbime, e këto nuk e dimë realisht se çka janë tu i shërby komunës tonë ose çfarë investimi janë tu u bërë. Kodi 13450 – Shërbime shtypje dhe printim: 17,539 euro. Krahasuar me vitin paraprak, për periudhën e njëjtë, ka rritje për 14,933.03 euro. Pse kaq shumë rritje dhe me tregu pak më shumë se çka do të thotë ky shërbim, si funksionon dhe qysh është kontrata e kësaj, a është kontratë fikse? Kodi 13610 – Furnizime për zyrë: 9,792.01 euro. Krahasuar me vitin paraprak ka rritje të shpenzimit për 5,669.05 euro më shumë. Domethënë ka më shumë se dyfishim të kësaj vlere. Edhe këtu kërkoj sqarime. Kodi 13250 – Telefonia fikse: 3,456.35 euro. Pse kaq shumë shpenzim vetëm për këtë tremujor? Kodi 13310 – Internet. Është një kod i ri, që

është shpenzim 1,123 euro. Edhe këtu kërkoj sqarim. Përpos kësaj që po kërkoj sqarim, unë po dua me njoftu komunën për një projekt i cili mbështetet nga BE-ja dhe nga GIZ-i, që i financon gjitha komunat që janë mbi 500 komuna dhe që ofron Wi-Fi falas. Ju si komunë mundeni me apliku dhe me marrë fonde, mos me shfrytëzu para publike për diçka që mundeni me marrë me financim të BE-së. Kodi 14032 – Mirëmbajtja e rrugëve lokale: 145,453.38 euro. Krahasuar me vitin 2025 apo paraprak ka rritje të shpenzimit për 39,219.77 euro. Edhe këtu kërkoj sqarime se ku është bërë ky shërbim, cilat rrugë dhe a nuk është kontrata fikse sa i përket këtij shërbimi? Pyetja e njëjtë edhe për Kodin 14060 – Mirëmbajtja rutinore. Nga 8,853 euro sa ka qenë në vitin 2025, në këtë vit është 36,038 euro. Pse kjo rritje kaq e lartë? Çka hyn te këto mirëmbajtje? Edhe kodi 13310 është kompensimi i përfaqësimit brenda vendit. Unë këtu dua ta jap një sqarim tjetër, që më herët, para 3 viteve, ky kod buxhetor ka qenë me përshkrim “dreka zyrtare”, prej vitit 2024 na ka ardhur si “kompensim i përfaqësimit brenda vendit”. Edhe për këtë tremujor ky kod, përfaqësimi thënë më shkurt lluksi, është 14,109 euro. Krahasuar me vitin paraprak ka rritje për 3,399 euro. Po ndalem te investimet kapitale, sepse aty shihet më së miri gjendja reale. Edhe më herët kemi ngritur shqetësime të vazhdueshme për vlerat që janë deklaruar. Nuk dihet sa janë reale ato investime, nuk dihet a janë të njëjtat me periudhën që ne jemi tu raportu. Tash në pasqyrat financiare ne i shohim shifrat, por kur i krahason me raportet e tjera, i sheh që ato nuk përputhen dhe del një rrëmujë e madhe – projekte që nuk përputhen, shifra që nuk dalin njësoj. Çka do të thotë kjo? Do të thotë që qytetari i Vitisë nuk është duke e ditë të vërtetën për investimet që po bëhen. Nuk është i informuar si duhet. Por më e keqja, as vetë komuna nuk është tu e ditë se si po ia del me kamuflu dhe me funksionu kështu. Edhe më keq, paratë po shkojnë në projekte që shpesh nuk i hyjnë në punë qytetarëve dhe nuk janë relevante me nevojat dhe kërkesat e tyre. Ndërkohë, nevojat bazike mbesin anash. E kemi diskutu që uji i pijshëm nuk ka qenë asnjëherë prioritet për të gjitha këto vite qeverisjeje në komunë. Thuhet se është ekzekutuar 92.95%. Mirëpo, prej 30 projekteve të listuara në këtë prezantim si investime kapitale, nënkryetar, 12 projekte që janë të listuara janë vendime gjyqësore, gjithsej 880,664.47 euro që kanë shkuar pagesa për vendime gjyqësore, ndërsa komplet investimet, qysh e përmendi zyrtari, janë diku 2 milionë euro. I bie gati se 1 milion janë pagesa për vendime gjyqësore. Edhe këtu dua një sqarim. E kuptoj që duhet me qenë të emëruara ashtu, por a bën me ditë cilat investime kanë qenë të planifikuara që vendimet gjyqësore i kanë marrë ato mjete financiare, sepse këto nuk janë pak mjete të marra.

z.Visar Demiri: Përshëndetje për të gjithë të pranishmit. Nuk kam ndonjë pyetje specifike, sepse nga përvoja pak a shumë e kuptoj se nga kanë shkuar shpenzimet. E kuptoj që kryesisht janë shpenzime gjyqësore, dhe këto barten edhe prej vitit të kaluar. Kisha kërkuar që ekzekutivi të ketë parasysh reduktimin e shpenzimeve të cilat mund të ndikohen dhe mund të reduktohen, e që nuk ndikojnë në cilësinë e shërbimeve dhe vetë shërbimet për qytetarët e Komunës së Vitisë. Ne e kuptojmë që po jetojmë në një ekonomi pak të trazuar dhe do të ketë inflacion këtë vit, dhe kjo është evidente momentalisht. Prandaj është mirë që të kemi parasysh reduktimin e shpenzimeve të cilat mund të reduktohen gjatë këtij viti.

znj.Elsa Jahija: Përshëndetje për të gjithë të pranishmit. Në pasqyrat tremujore të buxhetit vërehet një nivel i konsiderueshëm i pagesave për vendime gjyqësore. Siç dihet, këto obligime, veçanërisht ato që lidhen me pagesat për mësimdhënësit sipas kontratës kolektive, kanë përbërë një barrë të ndjeshme financiare për Komunën e Vitisë dhe kanë ndikuar drejtpërdrejt në strukturën buxhetore në të kaluarën. Në këtë drejtim, do të doja të jem e informuar nëse ekziston një planifikim i qartë dhe i detajuar lidhur me shumën e mbetur për t'u paguar nga këto obligime. Po ashtu, do të ishte me rëndësi të dimë sa është i vlerësuar rreziku që gjatë këtij viti të përballemi sërish me vështirësi financiare dhe me ndikim në strukturën buxhetore, në një shkallë të ngjashme apo më të theksuar krahasuar me vitin e kaluar.

z.Ekrem Abazi: Përshëndetje për të gjithë të pranishmit. Unë po e shoh që jemi duke diskutuar për pasqyrat financiare të buxhetit për periudhën janar–mars 2026, jo për vitin 2025. Të hyrat vetanake gjatë kësaj periudhe janë inkasuar gjithsej 184 mijë e 510 euro. Krahasuar me të hyrat për periudhën janar–mars 2025, janë më të ulëta për 26 mijë e 770 euro. Arsyetimi që është dhënë lidhet me mosshpërndarjen me kohë të faturave të tatimit në pronë. Shpenzimet buxhetore: buxheti i alokuar për periudhën janar–mars 2026 nga të gjitha fondet është 7 milion e 99 mijë e 162 euro, ndërsa shpenzimet janë 6 milion e 598 mijë e 950 euro. Shkalla e ekzekutimit të

buxhetit ka qenë 92.95%. Këtë shkallë e rrit më së shumti paga dhe mëditjet. Duke u fokusuar vetëm në disa shpenzime: Shërbime këshilldhënëse dhe profesionale: 186 mijë e 592 euro. Këtu nuk është vetëm pyetje, por kërkoj edhe sqarim, sepse ne po pyesim por sqarime nuk po na jepen fare; Shërbime të ndryshme shëndetësore: 185 mijë e 540 euro; Mirëmbajtja e ndërtesave administrative dhe afariste: 98 mijë e 115 euro; Mirëmbajtja e rrugëve lokale: 148 mijë e 453 euro; Pajisje tjera: 16 mijë e 185 euro. Të hyrat buxhetore të planifikuara dhe të realizuara për periudhën janar–mars 2026; Tatimi në pronë – të planifikuara 157 mijë e 290 euro, të realizuara 65 mijë e 913 euro, ose 41.91%. Prapë po e theksoj që për këtë duhet arsyetim; Te urbanizmi kemi 0.12% dhe kjo po më bën me dyshu që diçka nuk është në rregull, por ju e dini më mire. Te shërbimet publike kam vërejtur një inkasim më të madh se sa është planifikuar. Hapësira publike: të planifikuara 1,852 euro, të inkasuara 6,644 euro; Reklama publike: të planifikuara 700 euro, të inkasuara 2,600 euro. Këtu shihet një rritje e mirë. Sa i përket prezantimit analitik të investimeve kapitale për periudhën janar–mars 2026: Ndërtimi i kanalizimeve në Komunën e Vitisë: 58 mijë e 152 euro; Ndërtimi i kanalizimeve në Viti: 41 mijë e 847 euro; Një tjetër ndërtim kanalizimi: 100 mijë euro. Gjithsej për kanalizime: rreth 200 mijë euro. Nuk është specifikuar qartë ku janë realizuar këto punë. Aty ku janë shumat e vogla është bërë specifikim, por aty ku janë shumat e mëdha nuk është sqaruar fare. Renovimi i ambulantave në Komunën e Vitisë: 24 mijë e 685 euro; Riparimi nëpër shkolla: 104 mijë euro; Ndërtimi i ujësjellësve: 32 mijë euro; Asfaltimi i rrugëve rurale: 260 mijë euro – nuk është sqaruar ku janë asfaltuar këto rrugë rurale. Nga 2 milion e 650 mijë euro investime kapitale, 906 mijë euro janë për pagesa për vendime gjyqësore, ndërsa 1 milion e 144 mijë janë për investime kapitale. Këtë duhet me ditë qytetarët që këtu ka edhe vendime gjyqësore, jo vetëm investime kapitale. Kërkoj që në këto pika që i theksova të jepet sqarim i detajuar se ku kanë shkuar këto mjete. E pashë te rrethojat për shkolla 6 mijë euro dhe më pëlqeu që është specifikuar, por te shumat e mëdha nuk po jepet sqarim. Kësaj here dua sqarim konkret: çka është bërë dhe ku janë realizuar këto investime.

z.Berat Zuka, zyrtar i Drejtorisë për Financa: U cek diferenca e shpenzimeve. Ju e dini që nga viti i kaluar kemi shumë prej 4 milion e 576 mijë euro obligime. Kemi arritur që në këtë tremujor obligimet deri në 1 milion e 800 mijë euro t'i zbresim komplet. Në këtë raport janë të prezantuara si shpenzime dhe aty e paraqet diferencën më të madhe të disa shumave, sepse ku ka pasur mundësi ne jemi munduar që t'u japim prioritet faturave të vjetra për t'i paguar. U përmendën edhe shpenzimet kapitale 900 mijë e 933 mijë euro. Të nderuar delegatë, plani i rrjedhjes së parasë më 16 janar, Departamenti i Thesarit e ka lejuar. Kur kemi filluar te projektet kapitale, 1 milion e 95 mijë euro vetëm kanë qenë të ngrira nga Thesari. U përmend pyetja se prej cilave projekte janë marrë. Unë po i përmendi vetëm dy: nga participimi i projekteve me donatorë janë marrë 200 mijë euro, nga granti qeveritar janë marrë 22 mijë euro, te renovimi i shkollave janë marrë, te rregullimi i tualeteve, dhe të gjitha mjetet që kanë qenë të grantit qeveritar, afër 300 mijë euro, dhe pjesa tjetër nga projekte të tjera. Nënkrëtar, në mbledhjen e ardhshme unë i nxjerr të gjitha këto projekte, prej sa mjeteve janë ngritur, janë hequr prej kodit buxhetor që kanë qenë të koduara dhe janë qitë me një kod të veçantë me zero katër. Kanë krijuar një kod Thesari si për ne edhe për komunat e tjera. Në mbledhjen e radhës ju garantoj se të gjitha projektet, prej ku janë marrë, me emër e mbiemër dhe shumë, kemi me i prezantuar. Në përgjegjësinë që u përmend kodit 13450, këto po përsëriten që dy herë. Unë që marr pjesë në prezantimin e raporteve financiare, ne i kemi kontratat kontraktuale me Caritas-in dhe me KosovaMed-in. Shumica e këtyre shpenzimeve që shihen në raportin financiar janar–mars janë obligime nga viti i kaluar, sepse në raportin financiar të dhjetorit janë prezantuar 2 milion e 800 mijë euro nga viti i kaluar, të cilat janë marrë nga buxheti i komunës dhe janë paguar shpenzime kontraktuale që kanë rrjedhur kryesisht nga kontrata kolektive. Shumë mirë u përmend nga një delegat që struktura buxhetore na është shkatërruar në tërësi, sidomos neve zyrtarëve financiarë që mundohemi me mbajtje në kontroll buxhetin, në momentin që kemi fillu me i zotui mjetet përmes sekondave neve na janë tërhequr dhe shihet një buxhet që është i shpenzuar 1 milion e 143 mijë euro te kapitale. Jemi mundu shpejt e shpejt mos me na zënë si vitin e kaluar, mjetet ku janë të lira më nuk na pyesin. Thesari ka urdhër të prerë dhe jemi mundu që ku kemi pasur mundësi dhe raporte, t'i zotëjmë mjetet, t'i shpenzojmë dhe t'i kryejmë obligimet, që Thesari të mos na i bllokojë në të ardhmen dhe shpenzimet përmbartimore nga kontrata kolektive, sipas avokatit të komunës, kemi mjaft. Ne po mundohemi me e bërë të pamundurën për me i krye obligimet, me mos na

u grumbullu mjetet në Thesar nëpër kategori apo fonde programe, por ata prap e bëjnë të veten, sikur vitin e kaluar. Nga shtatori me një buxhet minimal kemi operu deri në fund të vitit. Këtë vit pritet që 1 milion e 95 mijë euro janë nga kapitalet dhe nga shërbimet publike 100 mijë euro, nga javët e kaluara janë marrë nga Departamenti i Shërbimeve Publike, janë ekzekutu, janë stonu prap sot në mëngjes kur kemi hy, kanë fillu me i ekzekutu pa dëshirën tonë, pa planin tonë. Drejtor, mu më kanë urdhëru edhe planin e rrjedhjes së parasë t'ia rregulloj Thesarit, me i marrë paret nga muaji maj–qershor për me i qitë në muajin prill për ekzekutim. Nuk është ndonjë problem se ata për një minut e rregullojnë vetë, por duhet me bë përpjekje çka mundemi me i ikë obligimeve me shpenzu buxhetin, dhe në fund ata, sikur para dy viteve, me na kompensu obligimet, si në vitin 2024 që kanë shtu buxhet 2 milion e 450 mijë euro në fund të vitit.

z.Ekrem Abazi: Prej kah i ke marrë paret me ju dhanë shumë njerëz? I keni marrë në punë me kontratë mbi vepër – prej cilit kod i keni marrë këto pare?

z.Berat Zuka, zyrtar i Drejtorisë për Financa: Kontrata mbi vepër i kemi vetëm 2 punëtorë. Kurse me Caritas-in dhe Kosova Med-in, ata nuk janë me kontratë mbi vepër, por janë me thirrje publike për kryerjen e shërbimeve.

z.Hasan Aliu, nënkryetar i Komunës: Kërkohen shumë përgjigje dhe në shumicën e rasteve edhe unë jam i barabartë me Majlindën, edhe unë jam ekzekutiv sikur edhe ti. Të vijmë pasqyrat financiare 7–8 herë si këshilltare e Kuvendit Komunal, por janë shumë të paqarta. Unë e di që ti i kupton, por po don me i ngrit si çështje. Majlinda e the mungesën e transparencës, unë konsideroj që Komuna më transparente është vështirë me u gjet, për shkak se ti nuk do të kishe mundur me bisedu vetëm për anët negative, por edhe për anët pozitive që i kanë vetë pasqyrat financiare, që nënkupton që është një lloj transparence. Këto pasqyra financiare do të dalin edhe në uebfaqen e komunës. Keqplanifikim dhe keqmenaxhim – unë konsideroj se as nuk ka keqplanifikim dhe keqmenaxhim. Krejt ju e dini se kontrata kolektive na ka prishur planifikimin dhe strukturën, dhe ndoshta të çon me u duk si keqmenaxhim, sepse ti ke planifikuar diçka tjetër, por mjetet janë marrë dhe nuk ke mundur me i realizu. Qysh ta quash, nuk është kjo problematikë vetëm e Komunës së Vitisë. E di që dikush thotë po don me i ikë përgjegjësisë, por po ju them me përgjegjësi të plotë, edhe pas takimit që kam pasur me kryetarin, dhe dje në takimin e bordit të Asociacionit të Komunave, shumica e komunave janë në buzë të bankrotimit, dhe burimi i kësaj është kontrata kolektive. Unë pajtohem që jo të gjitha vendimet vijnë vetëm nga kontrata kolektive, por 95% e rasteve të vendimeve gjyqësore burojnë prej saj. Sepse ti ke hyrë në marrëdhënie kontraktuale, dhe kur vjen koha nuk i ke mjetet, dhe ato pastaj obligohen me vendime gjyqësore. Pse nuk është bërë zgjidhje për këtë çështje është temë tjetër, por fakti është që nuk ka përjashtim – të gjitha komunat e Republikës së Kosovës janë në këtë situatë. Te lejet e ndërtimit, unë kam qenë vetë drejtor. Te çështjet ku mundesh me pas një planifikim sado pak, si te tatimi në pronë, e din sa e planifikon për vitin e ardhshëm. Por aty ku varet nga kërkesat e qytetarëve, nuk mundesh me qenë saktë, sepse nuk e din cilët qytetarë janë në gjendje me investu vitin tjetër, prandaj ka dallime. Shërbimet këshilldhënëse vijnë nga marrëveshja me AZhR dhe kontrata me Kosova Med-in. Te shtypja dhe printimi, është kontratë e nivelit qendror, dhe ata e kontrollojnë sa është printuar, ta sjellin faturën dhe ti je obligativ me e ekzekutu. Edhe te telefonja mobile kemi shpenzuar, por ende nuk janë ekzekutuar pagesat, sepse kemi obligime. Unë të kam thënë edhe në seancën e kaluar që rreth 4.5 milion euro i kemi regjistru si obligime për vitin 2026, prandaj shumica e këtyre janë ato. Mirëmbajtja e rrugëve lokale nuk ka kontratë fikse për sasinë e shpenzimit, sepse nuk e dimë sa borë do të bjerë apo sa do të prishen rrugët. Është kornizë dhe në bazë të punës bëhet faturimi dhe ekzekutimi. Te shpenzimet për përfaqësim brenda vendit, këto besoj që Berati i saktëson në seancën e ardhshme. Te investimet kapitale, ndoshta ti nuk mundesh me ditë, por Komuna e Vitisë nuk është shumë e madhe që mos me ditë ku po punohet. Investimet nuk janë gjithmonë konform nevojave bazë, por janë konform kërkesave dhe programit të kandidatit që ka fitu për kryetar komune. Visar, pajtohem që duhet reduktim i shpenzimeve, sepse ndoshta nuk jemi në krizë ekonomike, por në krizë komunale jemi. Elsa, për vendimet gjyqësore nuk kam informatë të saktë sa janë obligimet, por besoj që janë diku kah përfundimi, edhe pse ka edhe shumë në pritje. Ekremi e shtoi se mjetet vetanake janë të ulëta për shkak të tatimit në pronë, por pritet përmirësim në gjashtëmujorin e dytë, megjithatë nuk pritet ndonjë rritje e madhe, sepse kapaciteti i Komunës së Vitisë është rreth 1.2–1.3 milion euro maksimum. Shkalla e shpenzimit

është e madhe dhe do të jetë edhe më e madhe. Për çdo ditë ballafaqohemi ku me i marrë mjetet dhe ku me i lënë obligimet. Ndonjëherë është vijë e kuqe, dhe mjetet janë tërhequr. Specifikimin e investimeve kapitale e marr si obligim t'i sjell të gjitha që u kërkuan. Te investimet kapitale, shumica janë projekte të realizuara vitin e kaluar dhe janë ekzekutuar këtë vit, sidomos rrugët rurale dhe kanalizimet.

z.Ekrem Abazi: Te shërbimet këshilldhënëse dhe profesionale u mor vesh që, te Kosova Med-i po shkojnë gjysma. Berat, a po sheh që nuk është siç the ti, por keni marrë punëtorë lidhje-palidhje kur i keni marrë gjatë zgjedhjeve, dhe tash kah fundi i marsit keni fillu disa me i hekë, dhe shkojnë do pare për këtë. Thash unë, këto që keni mundësi me i ndal, ndalni. Ato që i ndal gjykata është shtet në veti, ajo është tjetër punë, por këto që i keni bërë ju për interesa personale, ulni dhe hiqni gati krejt, sepse nuk keni nevojë. Nëse keni nevojë për ata punëtorë, shpallni konkurs për ata punëtorë, nuk ke nevojë me më sjellë shënime hiq, se e kuptova.

z.Bekim Azizi, kryesues i Kuvendit: Edhe këtë pjesën e telefonisë fikse është mirë me e nxjerr sakt, edhe pse nuk është vetëm shpenzim i telefonisë fikse, sepse më së paku përdoret telefonia fikse. Por aty hyjnë edhe gjëra tjera që është mirë me qenë edhe si informatë.

znj.Majlinda Shabani: Po i drejtohem zyrtarit, sepse unë e kuptoj që duhet me u rregullu struktura buxhetore dhe ai e ka aspektin e tij profesional. Tash, nëse flasim në gjuhën e një profesionisti dhe e kuptojmë natyrën e punës që bën, jemi në rregull me këtë pjesë. Por nëse flasim në aspektin e qytetarit të Komunës së Vitisë, i cili kërkon me ditë se ku po shkojnë paratë e qytetarëve, është një paqartësi shumë e madhe. Nënkryetar, të dëgjova me vëmendje. Nga fjalimi im nuk e largoj asnjë pikë e presje të asaj që kam thënë për transparencën që duhet me pas në shpenzimin e parasë publike dhe sidomos te transparenca buxhetore, sepse duhet me pas parasysh që kjo matet edhe te indeksi i transparencës buxhetore, se sa po del Komuna e Vitisë. Prej diskutimeve që i bëmë, unë te vendimet gjyqësore e bëra pyetjen dhe po mendoj që, përpos që është pagesë që nuk varet prej juve, të paktën mundeni me dhanë sqarim se cili investim ka qenë i planifikuar që është marrë prej pagesave të vendimeve gjyqësore. Deri sa në prezantimin analitik të investimeve kapitale, prej 30 emërtimeve, 12 prej tyre i ke që janë vendime gjyqësore, andaj këtu duhet me pa secilin emërtim që figuron te prezantimi analitik i investimeve. Kur të marrim sqarim për këto 12 emërtime që keni bërë se cilat shkojnë, atëherë mundemi me qenë më në rregull. U diskutuan shërbimet këshilldhënëse dhe profesionale dhe u morëm vesh që janë kontrata që keni lidhur me Kosova Med dhe AZHR. Këtu e kam problemin unë te AZHR, sepse ka qenë diskutim që e kam ngrit edhe vitet paraprake. Janë njerëz që janë të punësuar në kuadër të kësaj marrëveshjeje që ju e keni bërë. Unë nuk e kuptoj çka bëjnë ata njerëz që marrin paga çdo muaj nga Komuna e Vitisë, dhe aty është një shumë e majme. Duhet me pas edhe këtu sqarim se çka bëjnë ata persona dhe ku hyjnë në punë këto shërbime këshilldhënëse dhe profesionale, qoftë prej personave që janë të kontraktuar përmes AZHR-së për Komunën e Vitisë, dhe me ditë më saktë ku shkojnë, çka i shërbejnë komunës dhe investimeve që bëhen për këtë. Thashë keqplanifikim dhe keqmenaxhim, sepse pikërisht e përmenda edhe në fillim që te investimet kapitale nuk është raporti real i investimeve që janë bërë në tremujorin që është raportuar këtu. I përmende edhe ti që janë para që janë bërë pagesa prej investimeve që kanë qenë më herët.

z.Bekim Azizi, kryesues i Kuvendit: Megjithatë, për disa informata tjera nuk kërkohen te kjo pikë, por kërkohet me ardhë me pikë të veçantë ose me shkresë, sepse vijnë përmes drejtorive se çka punojnë. Pikat për të cilat jemi sot janë të shpenzimeve dhe të hyrave se çka është bërë për këtë tremujor.

z.Illir Zuka: Në KPF kam ngritur një problem, nuk e di a është marrë nënkryetari me të. Te tatimi në pronë, njëri prej asambleistëve tha që nuk kanë ardhur faturat. Faturat kanë ardhur, por diçka nuk është në rregull dhe duhet me i shiku, sepse mua personalisht çdo vit më ka ardhur mbi 50 euro, ndërsa këtë vit më ka ardhur vetëm 10 euro.

z.Ekrem Abazi: Ty të ka ardh faktura, e shumices së qytetareve nuk ju ka ardh.

z.Basri Aliu: U diskutua shumë në lidhje me këtë pikë të rendit të ditës. Herën tjetër do ta kisha lutë drejtorin apo zyrtarin që me i hyrë shifrave me rend, t'i lexojë një nga një, që mos të kemi nevojë ne me i lexu edhe një herë të gjitha, dhe me u kry puna më efikase dhe më shpejt. U diskutua rreth shpenzimeve se si kanë ndodhur. Unë thashë që këto kanë mundur me ndodh edhe vitin e kaluar, domethënë grumbullohen faturat dhe paraqiten në këtë tremujor. Një shpenzim shumë i madh, njësoj edhe ti që e përmende kryesues, te telefonia mobile, dhe

aty është problemi i njëjtë: janë grumbullu faturat e vitit të kaluar, të cilat nuk janë kryer dhe në këtë tremujor janë kryer dhe paraqiten si shpenzim i madh. Gjithashtu te telefonja mobile hyn edhe interneti, nuk është vetëm puna e telefonave, por edhe interneti që e përdorin disa zyra nëpër ndërtesat komunale. Ju kisha lutë të gjithëve që të përcaktohem i pika e rendit të ditës dhe te efikasiteti i saj, sepse ne kërkojmë sa punëtorë ka një kompani. Numri i punëtorëve duhet të kërkohej te kompania që e ka kontratën, dhe këtu nuk ke nevojë me e ngrit, sepse nuk ka të drejtë askush me e ditë numrin e një kompanie tjetër. Prandaj të jemi të sigurtë dhe të mos bëjmë pyetje që nuk na përkasin as neve si Kuvend, as ekzekutivit.

z.Bekim Azizi, kryesues i Kuvendit: Çdo informatë që bëhet me pagesa nga buxheti komunal, përgjegjës për buxhetin komunal është Kuvendi Komunal, ndërsa për ekzekutimin është ekzekutivi. Domethënë, për çdo shpenzim që bëhet, anëtarët e Kuvendit kanë të drejtë me kërku informata. Të gjitha informatat është mirë me u sjellë dhe me u ditë.

z.Illir Zuka: Nuk pata asgjë me asnjë asamblist, veç kur e ngriti atë mu kutjua se bëra një kërkesë në KPF drejtoreshës dhe nënkryetarit. Me këqyr si problem.

z.Remzi Salihu: Përsëritet për të gjithë të pranishmit. Ishte një diskutim mjaft frytdhënës nga të gjithë diskutuesit paraprak dhe u cekën të arriturat, të metat dhe të gjitha të tjerat. Kam një pyetje të thjeshtë: janë mbi 4 milionë obligime, ndërsa në raportet financiare të çdo fundviti, që i bie edhe për vitin 2025, është thënë që realizimi është bërë 98% i planit të buxhetit. Prandaj pyes: si kanë mbetur këto obligime? Kur do të shlyhen këto obligime dhe nga do të shlyhen? A do të ndikojnë për vitin 2026 dhe nga do t'i merrni paratë për shlyerjen e tyre? E di që do të ceket kontrata kolektive, por pyetja ime është si do të shlyhen konkretisht këto obligime.

z.Ekrem Abazi: Basria shkoi se kesh tu i thanë që pikën e parë e kemi pasqyrat financiare janar–mars 2026. Ai mu nuk mundet me m'kallxu çka thom unë; pyeti çka du unë. Unë jam tu folë për këto pasqyra, e ti je me m'tregu që këto shpenzime janë të vitit 2025.

z.Hasan Aliu, nënkryetar i Komunës: Ekrem, po filloj prej teje. Shumë saktë e ke thënë se propozues i buxhetit është ekzekutivi, aprovues i buxhetit është kuvendi dhe ai që e aprovon ka të drejtë me kërku llogari gjithëherë. Remzia ka shtrur një çështje që është me të vërtetë shumë problematike për neve si ekzekutiv, që ka me shkak problem edhe për kuvendarët, por që ka me reflektu edhe te qytetarët. Remziut nuk është tu i dhimt borxhi real prej 4 milionë eurosh, por është tu i dhimt që ndoshta kanë me na ekzekutu, nuk kemi mundësi, vonohemi edhe kanë me na qu në përmbarues, e tani shtohen edhe nja 600-700 mijë euro. Kjo më dhemb ma së shumti, se krejt këtë rrëmujë të realizimit të kontratës kolektive, unë si nënkryetar komune kam pa një përfitim marramendës të përmbaruesve dhe avokatëve. Nuk mu ka dhimt ajo që i kanë marrë profesorët dhe arsimtarët, për shkak se ka qenë kontratë e nënshkruar, por më është dhimt që nuk e kemi ba në koordinim apo bashkëpunim me qeverinë me gjet çelësin qysh me pagu borxhin real të atyne që kanë qenë nënshkruar të kontratës, por kemi pagu edhe nja 40-50% ma shumë. Pikërisht këto obligime të grumbulluara prej 4.5 milionë eurosh, ishalla mrijmë me i realizu pa vendime gjyqësore, që me pagu vetëm bazën e borxhit e jo edhe kamatat, përmbaruesit, avokatët e tjera. Qysh do t'i paguajmë? Unë e shoh vitin 2026 shumë problematik, bile edhe fillimin e vitit 2027. Ndoshta po mendoj sipas raportimeve të djeshme që kanë raportu deri tash të gjitha komunat. Siç raportoj kryetari, 350 milionë euro për krejt komunat është fjala, ndërsa në mesin e tyre Komuna e Vitisë është diku 9 milionë euro. E tani, siç tha kryesuesi, 13 milionë euro ia kanë marrë Ferizajt. A do të ulen me gjet një çelës që të rimbursohen këto? Kjo e ka edhe aspektin praktik edhe ligjor, për shkak se ne nuk kemi qenë nënshkruar të kontratës. E dyta, edhe tentativën tonë me kriju borxh në ekzekutim nuk na kanë lanë. Nuk e di, por a kemi me qenë në situatë të randë në 2026 dhe në periudhën e parë të vitit 2027? Po ta garantoj që po.

z.Remzi Salihu: Faleminderit, nënkryetar, për përgjigjen, por megjithatë unë po shoh se gjithmonë këqyr faji me iu lanë dikujt tjetër. Unë dua me dalë edhe në politikë, se pikërisht këtu mendoj që kemi qenë ma të zëshëm në kuvend rreth kontratës kolektive. Gjatë asaj kohe kam qenë edhe në procesin mësimor që të bëhet një kontratë mes punëtorëve të arsimit dhe Komunës së Vitisë, me u tejkalu kjo çështje që na ka brengos atëherë, e që kryetari vazhdimisht e ka injor. Me thanë që kjo kontratë është bërë pa na pyet neve dhe ne nuk diskutojmë fare për këtë, a ka pas mundësi që të mirren vesh edhe kuvendi ta marrë një vendim që ai obligim të bëhet me pagesë, qoftë me këste, qoftë mujore, nuk e di në çfarë mënyre, por vetëm që të rregullohet e të mos vijmë në

këtë situatë që jemi tani. Sepse mbi gjysa e këtyre mjeteve kanë shku pa nevojë hiq në vendime gjyqësore, ku përmbarues, avokatë etj., domethënë ma shumë kanë marrë pare ata sesa kanë marrë punëtorët e arsimit apo edhe disa të tjerë që faktikisht, sipas kontratës, ka qenë obligim me i pagu. Prandaj unë mendoj dhe qëndroj prapë në ato bindjet e mia se kjo ka qenë e mundur të rregullohet para 4 viteve. E ka neglizhu kryetari i komunës, prandaj kemi ardhë deri në këtë situatë. Natyrisht nuk po e shfajësoj askënd, se shumë kush ka faj këtu, por në këtë rast, sa i përket raportit të Komunës, unë mendoj se fajin kryesor e ka kryetari i Komunës së Vitisë.

z.Hasan Aliu, nënkryetar i Komunës: Remzi, ajo është bindja jote, por unë po ta jap një sqarim. Për fat të mirë paskemi edhe zyrtarin e lartë financiar, të cilit edhe në takim unë së bashku me kryetarin i kemi thanë se duhet me pyet në Prishtinë me ba një kod në ekzekutim të kontratës kolektive. Po ta them me bindje të plotë, se është këtu njeri, të cilët kur kanë pyet, nuk na kanë leju. Prandaj nuk ekziston ajo bindje të cilën po e thu se e ka anashkalu. Unë e di si çështje kur e ke ngrit ti një herë, e di që kemi mbajt mbledhjen e kuvendit në shkollën e mesme teknike, e ka ngrit edhe kryesuesi, por krejt këto kanë shku në adresë që je obligativ me i pyet për hapjen e kodeve. Dhe mundësitë, tani kur t'ish hap kodi, kishin ekzistuar edhe mundësitë e arritjes së marrëveshjes në ekzekutiv, por kemi hasë në pengesa; kanë thanë që nuk mundemi.

z.Bekim Azizi, kryesues i Kuvendit: Është përnjëmend e dhimbshë, sa i kam përcjell statistikën e vitit të kaluar të kontratave kolektive, që diku rreth 45% kanë shku në procedura të përmbaruesit e avokatët; domethënë pak mbi 50% kanë shku te mësimdhënësit. Kjo është ma e randa, që gati gjysa e mjeteve kanë shku tjetërkund.

z.Berat Zuka, zyrtar i Drejtorisë për Financa: Kryesues, ke qenë edhe ti në takim në Gjilan, kur s'un i kam arsyetuar te pagat 350 mijë euro. Ke qenë aty dhe shumë mirë kam qenë i kuartë se 350 mijë euro kam kërku që në Kornizën Afatmesme Buxhetore mjete shtesë për pagesën e kontratës kolektive. Kjo ka qenë diku në vitin 2023/24. Dhe 250 mijë euro mbetje gjatë vitit për punëtorët që nuk janë në punë. E din atëherë që Departamenti i Buxhetit na i nxori neve dhe gjithëkomunave, ka thanë që nuk keni të drejtë asnjë cent me planifikuar për problemin e kontratës kolektive. Atëherë ka qenë e vogël, ka 600/700 mijë euro vjetorja, dhe nuk na kanë leju. Edhe pas pyetjeve të gjitha komunave tjera, në forumet që i kemi mbajtë, takimet me Departamentin e Buxhetit, nuk ka ekzistuar një gatishmëri e Ministrisë së Financave për me na leju neve, bile së paku me bë një pjesë të planifikimit të disa mjeteve për këtë destinacion.

z.Bekim Azizi, kryesues i Kuvendit: Faleminderit për debatin. Kjo pikë është vetëm informacion, nuk del në votim, kalojmë në pikën tjetër të rendit të ditës.

Si pikë e tretë e rendit të ditës

3. Propozim për shqyrtimin dhe miratimin e propozimit vendimit për nisjen e procedurave për themelimin e ndërmarrjes publike lokale (NPL) në Komunën e Vitisë

z.Arton Musliu, drejtor: Përsëritet për të gjithë të pranishmit. Para jush paraqes vendimin për nisjen e procedurave për themelimin e ndërmarrjes publike lokale, e cila do të ketë një mori përgjegjësisë që kanë për qëllim ofrimin e shërbimeve publike efikase, efektive dhe transparente në raport me qytetarët e Komunës së Vitisë. Qëllimin e themelimit të ndërmarrjes publike e keni edhe në vendimin para jush. Unë kam përfshi katër qëllime kryesore, të cilat më vonë mundën edhe me u ndërthur me qëllime tjera. Pra, menaxhimi dhe mirëmbajtja e hapësirave dhe aseteve publike përmes ofrimit të shërbimeve cilësore dhe efikase në komunë; Kursimi i taksave për qytetarët që shkojnë për pagesa të shërbimeve që i ofrojnë operatorët ekonomikë privatë; rritja e përgjegjësisë dhe transparencës gjatë ofrimit të shërbimeve publike; zgjerimi dhe përmirësimi i shërbimeve që u ofrohen qytetarëve të Komunës së Vitisë. Në kuadër të përgjegjësisë që kemi parapa bashkë me ekzekutivin, e që do të parashihen në kuadër të ndërmarrjes publike, janë këto: menaxhimi i stacionit të autobusëve; menaxhimi i tregjeve; menaxhimi i parkingjeve publike; mirëmbajtja e hapësirave publike, shesheve dhe parqeve; mirëmbajtja e objekteve publike; mirëmbajtja dhe pastrimi i shtretërve të lumenjve; mirëmbajtja e varrezave dhe shërbimet e varrimit; menaxhimi dhe trajtimi i mbeturinave; dhe përgjegjësi tjera që ndërlidhen me shërbime publike, pra përgjegjësi që do të dalin si nevojë për qytetarët e Komunës së Vitisë ndërkohë gjatë realizimit të themelimit të kësaj ndërmarrjeje publike. Baza ligjore për themelimin e kësaj ndërmarrjeje publike ekziston në Ligjin për ndryshimin e Ligjit për ndërmarrjet publike, respektivisht neni 6, si dhe në Rregulloren për kriteret e formimit të ndërmarrjeve publike, neni 4 paragrafi 1. Sipas nenit 6 të Ligjit

për ndryshimin e Ligjit për ndërmarrjet publike, komunat kanë të drejtë të krijojnë ndërmarrje publike lokale në pajtim me kriteret e përcaktuara me akte nënligjore të qeverisë. Kriteret duhet të përfshijnë kërkesa të arsyeshme për qëndrueshmërinë financiare dhe operacionale të ndërmarrjes. Siç e thashë edhe në fillim, ndër arsyet kryesore të themelimit të ndërmarrjes publike lokale janë çmimet e larta që komuna paguan për shërbimet që i ofrojnë operatorët ekonomikë privatë. Qëllimi është që mjetet që i paguajnë qytetarët e Komunës së Vitisë të mos shkojnë si fitim për operatorët ekonomikë privatë, por si shërbim ndaj qytetarëve të komunës. Siç e dimë të gjithë, relacioni mes komunës dhe operatorëve ekonomikë privatë që ofrojnë shërbime në lëmin e shërbimeve publike nuk është as i thjeshtë dhe as i lehtë. Si rezultat i kësaj, kemi vështirësi në realizimin e shërbimeve që ne i kemi obligim ligjor me i kry, duke fillu prej pamundësisë së realizimit të pagesave në kohë të arsyeshme e deri te injorimi i operatorëve ekonomikë privatë për me i kry punët për të cilat janë të obliguar përmes kontratës që e kanë me komunën. Arsyeja e dytë është cilësia e dobët që ofrojnë operatorët ekonomikë privatë gjatë shërbimeve që ata i ofrojnë. Pra, kontrolla që ne e bëjmë është deri diku e mirë, mirëpo ne nuk kemi shumë mekanizma me i detyru ata me i përfundu punët ashtu siç janë me kontratë për shërbime, për shkak se nëse hyjmë në ciklin e ballafaqimit me operatorët privatë, ne rrezikojmë me i humb shërbimet që komuna i ofron. Për këtë arsye, qasja e Drejtorisë së Shërbimeve Publike, por edhe e komunës, është që të gjendet një rrugë e mesme në mënyrë që edhe të rrisim mbikëqyrjen dhe transparencën, por edhe të mos mbesim pa shërbime që ata i ofrojnë. Arsyeja e tretë për themelimin e kësaj ndërmarrjeje publike është neglizhenca në ofrimin e shërbimeve publike. Kemi operatorë ekonomikë privatë apo operatorë publiko-privatë të cilët hezitojnë me i kry punët ashtu siç janë të obliguar në bazë të kontratës apo marrëveshjes. Një prej rasteve është rasti me Ekohigjienën. Ekohigjiena, siç e dini ju, është operator publiko-privat ku Komuna e Vitisë është aksionare aty, mirëpo trajtimi i mbeturinave nuk është në nivelin më të mirë të mundshëm. Unë si drejtor i Shërbimeve Publike dhe Emergjencave, bashkë me ekzekutivin dhe kryetarin, i kemi marrë disa hapa për me e ngrit vetëdijen rreth trajtimit të mbeturinave, mirëpo ende jemi larg qëllimit. Nga 7885 familje që ka Komuna e Vitisë, vetëm 4811 janë të regjistruara në Ekohigjienë, që i bie 61%, ndërsa 3074 nuk janë të regjistruara. Ato shtëpi që nuk janë të regjistruara në Ekohigjienë i hedhin mbeturinat në vende të paautorizuara dhe kjo paraqet problem për neve. Pra, njëra prej qëllimeve që ne kemi iniciu për themelimin e kësaj ndërmarrjeje publike është që shërbimet publike me qenë transparente, efikase dhe qytetari me pasë sakt adresën se ku dhe si mundet me i realizu shërbimet që ata kanë nevojë. Përndryshe, trendi për themelimin e ndërmarrjeve publike në Republikën e Kosovës është në rritje. Aktualisht 14 komuna kanë themelua ndërmarrje publike lokale, gjithashtu ka edhe disa komuna që janë në pritje të vendimit nga qeveria, duke qenë se kanë bërë kërkesë që nga viti 2022 për themelimin e ndërmarrjeve publike, mirëpo qeveria ende nuk ka marrë vendim për themelimin e tyre. Statusi ligjor i ndërmarrjes publike do të jetë shoqëri aksionare e ndarë prej komunës. Në momentin që themelohet ndërmarrja publike, komuna nuk ka të drejtë të përzihet në menaxhimin e saj, për shkak se kjo kompani do ta ketë bordin e drejtorëve, bordin e aksionarëve dhe bordin e menaxhmentit. Sa i përket qëndrueshmërisë financiare, ne kemi raste konkrete të qëndrueshmërisë financiare të ndërmarrjeve publike që aktualisht funksionojnë. Për shembull, ndërmarrja publike “Tregu” në Gjilan ka të hyra vjetore 447 mijë euro, ndërsa shpenzime 413 mijë euro. Apo ta zëmë “Eko Natyra” në Skenderaj ka shpenzime 202 mijë euro vjetore, ndërsa të hyra ka 203 mijë euro. Dua të them që qëndrueshmëria financiare e ndërmarrjes publike është e garantuar, për shkak se këtë e kallxon edhe grafika, por edhe kalkulimet që ne i kemi bërë si komunë na japin siguri që qëndrueshmëria financiare e kësaj ndërmarrjeje publike ka me qenë e lehtë dhe e përballueshme. Edhe në aspektin e formimit dhe funksionimit të ndërmarrjeve publike lokale jashtë Republikës së Kosovës, trendi është në rritje. Është një trend i deprivatizimit të shërbimeve publike gjithandej botës dhe, nëse marrim krahasimisht disa shtete, të gjitha këto shtete kanë nisë një cikël të ri të themelimit të ndërmarrjeve të reja publike, për shkak se qëllimi është që shërbimet publike që i ofrojnë operatorët ekonomikë privatë aktualisht nuk janë të kënaqshme dhe komunat po shkojnë drejt asaj që shërbimet publike prapë të deprivatizohen dhe t’i ofrojnë vetë. Unë besoj që kjo nismë është e mirë, qëllimi dhe vullneti janë për me bë diçka të mirë për Komunën e Vitisë dhe ky është vetëm një vendim për fillimin e procedurave për themelimin e ndërmarrjes publike. Pasi të votohet ky vendim në Kuvendin Komunal, atëherë duhet të shkojë në Ministrinë

e Administrimit të Pushtetit Lokal dhe më vonë duhet me i fillu procedurat për themelimin e ndërmarrjes publike, të cilat janë procedura jo të lehta. Dhe krejt në fund, në mënyrë që ne me i fillu këto procedura, duhet me kalu vendimi në Qeverinë e Republikës së Kosovës.

z.Bekim Azizi, kryesues i Kuvendit: Kjo është vetëm një nismë. Në kuadër të kësaj nisme ka mbetur procedura që, në momentin që lejohet prej ministrisë, kanë me fillu procedurat që na takojnë neve si komunë dhe prapë me ardhë në kuvend, me e bë themelimin në kuvend. Kjo është një nismë që para 6 viteve, me Hekremi, e kemi nisë kur kemi pasë kërkesë me dhanë në shfrytëzim stacionin e autobusëve të Gjilanit. Ne atëherë kemi kërku që të bëhet një ndërmarrje dhe kemi pasë pengu me votë që mos me i kalu stacioni i autobusëve, por me u bë një ndërmarrje e tillë komunale dhe me i shti disa shërbime tjera.

z.Basri Aliu: Lidhur me këtë pikë, ne si grup parlamentar i LDK-së e përkrahim themelimin e ndërmarrjes publike lokale, e cila është e përcaktuar edhe me ligj, që ka mundësi dhe rregullore mbi themelimin e këtyre ndërmarrjeve. Duke pasë parasysh se punët të cilat do të kryhen, dmth, do të kryhen në territorin e komunës së Vitisë dhe do të menaxhohen prej njerëzve të komunës së Vitisë, sepse shpesh ka ndodhë që punët të cilat i kemi dhanë, kanë ardhë kompani nga jashtë dhe ato distanca e kanë bë të veten për mos-efikasitet, prandaj jemi të pajtimit që të shkojë si propozim në shqyrtim. Mandej vijnë edhe filtrat tjerë, të cilët do të vijnë te ne këtu, sepse ne jemi sigurisht edhe aksionarët më të mëdhenj. Kuvendi është themelues i kësaj kompanie, sepse si aksionar ne do t'i kemi 2 anëtarë, ndërsa ekzekutivi 1 anëtar. Prapë vjen në filtrat tanë dhe mos ta pengojmë procesin dhe idenë të cilën e kemi marrë përpara.

z.Bekim Azizi, kryesues i Kuvendit: Në mënyrën se si rregullohet, prap krejt ka me vendos kuvendi.

z.Visar Demiri: Dhe ne si grup i PDK-së jemi pro kësaj nisme, me shpresë që do të ofroj shërbime më cilësore, efikase për qytetarë të Komunës së Vitisë. Drejtori i dha sqarimet dhe bazën ligjore.

znj.Majlinda Shabani: Po më vjen mirë që kjo puna e themelimit të ndërmarrjes publike ka qenë në plan-programin tonë qeverisës, kështu që është marrë si ide. Ne e kemi pasë në plan-programin tonë. A është dashtë me u nisë ma herët si iniciativë? Është dashtë me u nisë, po tash më mirë vonë se kurrë. Unë po e shoh se sa seriozisht e ka marrë drejtori këtë çështje, po në situatën që jemi dhe që gjendemi si komunë, unë i kam ato dyshimet e mia se sa ka me qenë i realizueshëm ky themelim i kësaj ndërmarrjeje. E kemi shumë të qartë nevojën se sa është e nevojshme me u bë themelimi i kësaj ndërmarrjeje, tue i përfshi edhe shërbimet që kanë me qenë në rritjen e cilësisë, e çka është më e rëndësishme, qëndrueshmërinë që duhet me qenë në komunën e Vitisë. Ka qenë shumë e nevojshme. Asesi nuk du me besu, dhe natyrisht që kemi me përcjellë në vazhdimësi se si ka me shku, nuk du me besu që kjo ka me qenë veç si ide për klientelizëm politik apo shpërdorim të parasë publike. Thashë, nevoja është shumë e madhe, mirëpo forma dhe ideja qysh është pru në kuvend komunal len hapësirë për dyshime. Nuk e di drejtori a është i informum me situatën që kemi në Komunën e Vitisë dhe se a ka me pasë hapësirë në planifikimet paraprake që kemi pasë dhe në programet qeverisëse të juaja. Tash sa vite janë bërë në qeverisje, nuk është që kemi pa diskutim për një themelim të ndërmarrjes publike. Atëherë, a ka me qenë i realizueshëm?

z.Bekim Azizi, kryesues i Kuvendit: E vetmja formë që mundet me ardhë në kuvend komunal është: e bëjmë propozim-vendimin, e protokolojmë, ma sjellin mua, e bëj rend të ditës dhe e bi. Kjo formë ka ardhë. Në formë tjetër nuk mundet me ardhë në kuvend kurrë asnjë pikë. Forma është në rregull. E dimë që procedura është e gjatë, por çka na lehtëson është që krejt këto shërbime që i blejmë ne përmes tenderave prej kompanive tjera, këto shërbime me i ofru komuna është e mirë. Ka me na u vonu kjo ndërmarrje deri sa të bëhet, por për të ardhmen është e mirë.

z.Elham Emerllahu: Përshëndetje për të gjithë të pranishmit. Rastësisht e kam pasë si çështje diskutimi, pata mendu për këtë seancë, por ja që erdhi edhe si pikë e rendit të ditës. Mendoj që është njëra prej çështjeve më të rëndësishme në kohën e fundit e cila ka ardhë për diskutim këtu. Nuk e di pse më herët nuk është iniciu themelimi i një kompanie apo ndërmarrjeje komunale. Ky koalicion qeverisës ka qenë edhe 4 vitet e kaluara bashkë, kanë pasë mundësi me inicui, tue e marrë parasysh shpenzimet dhe mjetet financiare të cilat komuna i paguan për mirëmbajtje dhe shërbime publike. Prandaj, është një rrugë e gjatë për themelimin e kësaj ndërmarrjeje. Uroj që ky proces që ka fillu të shkojë deri në fund dhe të merret shumë seriozisht, sepse rëndësia

e saj është shumë e madhe. Procedurat janë të gjata. Unë jam interesu këto ditë dhe, me konsultat me drejtorin, dmth është një rrugë e gjatë, por që jemi vonë, jemi vonë. Ndoshta është dashtë me rishiku mundësinë, për shkak të mirëfunksionimit të saj, është dashtë me kqyrë mundësinë edhe për publiko-private, dmth me kqyrë me harmonizu, sepse nuk është bash lehtë. Unë e di që disa komuna së fundmi kanë themelu. Kjo nuk varet krejt prej kuvendit komunal, as prej ekzekutivit. Mesa e kam kuptu, është edhe një këshill ndërmnistror që duhet me miratu, pastaj me kalu në qeveri. Në qeveri mundet me qenë dikush tjetër, jo i koalicionit qeverisës komunal etj., etj. Por, në aspektin procedural dhe të rregullores për themelimin e kësaj ndërmarrjeje, komuna dhe drejtoria duhet të jenë shumë të përgatitura. Labinot Bislimi ka dërgu një mesazh, kryesues, për këtë pikë të rendit të ditës.

z.Bekim Azizi, kryesues i Kuvendit: Unë mendoj që anëtari i kuvendit duhet me qenë shumë serioz, sepse kemi përgjegjësi para qytetarit, kemi përgjegjësi ligjore. Çdo kërkesë e anëtarit të kuvendit, edhe kur nuk mundet me qenë këtu, edhe kur mundet me çu një kërkesë për një çështje, për këtë është sekretaria e kuvendit. Elham, qeveria është e Republikës së Kosovës, kushdo që është.

zn.Liridona Bislimi: Përsëndetje për të gjithë të pranishmit. Singerisht, nga ajo që u tha, deshta me e përgëzu drejtorin te një pjesë të cilën e përmendi për menaxhimin e mbeturinave, se si komunë sa keq qëndrojmë, për shkak se çdo herë, viteve paraprake, gjatë muajit prill, kryetari Sokol Haliti ka dalë me deklarata të ndryshme duke e proklamuar komunën e Vitisë edhe me tituj që komuna e Vitisë nuk ka nevojë për pastrim. Mandej këtu kemi mrri deri aty sa me thanë që kaq mirë qëndrojmë. Sa i përket kësaj pike, po na kërkohet me marrë një vendim të madh për komunën e Vitisë, me votu për me u formu një Ndërmarrje Publike Lokale, për të cilën po thuhet se me themelimin e saj disa nga qëllimet kryesore, i keni përmend 9 pika: menaxhimi i hapësirave dhe aseteve publike, ulja e kostos për qytetarët, rritja e transparencës, zgjerimi i shërbimeve. E kompetencat keni thanë se drejtohen te stacioni i autobusëve, parkingjet publike, hapësirat publike (parqe, sheshe), objektet publike, pastrimi dhe mirëmbajtja, menaxhimi i mbeturinave dhe varrezat. Kjo ka qenë një ndër informatat që më së shumti kemi diskutu në Komitetin për Politikë dhe Financa dhe të gjithë kemi qenë të dakordum se fillimisht problemi kryesor qëndron se ky dokument është shumë i përgjithshëm. Për një temë kaq serioze dhe me qëllime kaq të zgjerume, materiali na është ofru vetëm në dy fleta, në të cilat ajo pak përmbledhje e shkurt që e keni ba, jeni mundu me u duk se krejt është në rregull. Keni vendos fjalë bajagi të mira, premtime për përmirësim, për kursim, për shërbime ma të mira. Po kur i lexon këto dy faqe, mandej përfundimi na çon krejt diku tjetër. I nderuar, ky dokument që e kemi përpara është i cekët. Nuk ka analizë financiare. Nuk ka studim fizibiliteti. Nuk ka plan konkret se qysh ka me funksionu kjo ndërmarrje. Pra, me pak fjalë, neve në kuvend komunal po na kërkohet me votu një ide, jo një projekt. Edhe singerisht, unë po du me ju pytë drejt: a ka kush këtu që e din sa ka me i kushtu kjo komunës? Sa punëtorë kanë me u punësu? Sa ka me përfitu qytetari konkretisht? Se në bazë të informacioneve që na i keni ofru, unë nuk e di. Edhe as në dokument nuk shkruhet. Edhe diçka tjetër: për këto shërbime që i keni përmend që kanë me u ofru këtu, kush na garanton neve që këto shërbime që po doni me i marrë, nuk janë tue funksionu tash e kanë me funksionu shumë ma ndryshe e shumë ma mirë? A keni ba analizë, apo veç po doni me ndryshu diçka për me kriju një strukturë të re? I nderuari drejtor, nuk keni qenë prezent në mbledhjen e KPF-së dhe aty e kam përmend si këshilltare komunale dhe kam qenë shumë e qartë: na nuk jemi kundër përmirësimit të shërbimeve, na nuk jemi kundër ndërmarrjeve publike, po jemi kundër kësaj mënyre të punës pa plan, pa analiza, pa transparencë. Këto janë pikat themelore. Duke u bazu në atë çka diskutova ma lart, ky propozim nuk duhet me kalu kështu siç është. Edhe në mbledhjen e Komitetit për Politikë dhe Financa kam kërku me e sjell me informacione ma të zgjerume, me sjell shifra, plan konkret dhe me pasë material me fakte konkrete, e jo propozim dyfletësh. Se pas këtij votimi, qytetarët atje jashtë presin prej neve përgjegjësi dhe sqarim me ju ofru se çka ka me ndodhë ma tutje, për shkak se është temë që ka ndikim të madh tek ta. E me kalu ky diskutim në forma të tilla, singerisht, as na këtu që jemi prezent pozitivë e opozitivë me përfundu me idenë që mos me ditë as çka jemi tue votu, është vërtet shumë jo e hijshme.

z.Bekim Azizi, kryesues i Kuvendit: Liridona, kemi diskutu edhe në komitet që për sot nuk ka mujtë me ardhë ma shumë se kjo, sepse është veç nismë. Kur ta themelojmë, duhet me pasë statut e gjithçka. Tash është vetëm një nismë për me na leju ministria me punu.

z.Hasan Aliu, nënkryetar i Komunës: Liridona, kemi diskutu edhe në komitet që për sot nuk ka mujtë me ardhë ma shumë se kjo, sepse është veç nismë. Kur ta themelojmë, duhet me pasë statut e krejt dokumentacionin përkatës. Tash është vetëm një nismë për me na leju ministria me vazhdu procedurat. Liridona, është mirë me qenë dhe me u sjellë në konformitet me pozitën që ke. Është mirë mos me sjellë dezinformata në kuvend. Kur thua që Sokol Haliti ka thënë “nuk ka nevojë me pastru se Vitia është e pastër”, kjo është e pavërtetë, shumë e pavërtetë. Nëse një njeri i kushton çështjes së ambientit në nivel të Republikës së Kosovës, me siguri do të ishte kampion dhe iniciativat i ka pasë dhe i ka. Në çdo ditë të shënuar që është në kalendar botëror dhe shtetëror, Sokol Haliti është prezent dhe shumë i përkushtum në këtë çështje. Sa i ka arritë qëllimit është çështje tjetër, po me thanë “ka thënë kështu” nuk është mirë, sepse duhet me qenë e përgjegjshme dhe e sjellshme në kuadër të pozicionit që ke. Edhe e përmende ju, këshilltarët e Vetëvendosjes, çështjen e transparencës. Unë nuk e di ku e keni gjetë atë mocion. Ju nuk jeni tu e kuptu vetë çka është transparenca, me të vërtetë nuk po e kuptoni. Majlinda dhe Liridona, nuk po e kuptoni. Krejt jeni sjellë te pasqyrat financiare, “nuk ka transparencë”, “nuk ke ofru argumente” – dhe këto janë të pavërteta. Ky është një propozim-vendim që e kam thanë edhe në KPF, që e kemi zbërthyer mirë edhe kryesuesi ka ndihmu në këtë drejtim. Është një iniciativë për themelim. Ka me shku në qeveri, aty ka komisione që kanë me thanë me përgatit këtë dokument, këtë dhe këtë, për me i plotësu kushtet për themelim. Pastaj vjen në kuvend, ku aprovohet edhe statuti i themelimit. A do të bëhet apo nuk do të bëhet nuk varet krejt prej neve. Gatishmëria jonë është për me u bë, dëshira e shumë këshilltarëve është për me u bë. Unë e di që ty disa emra këtu të kanë ba të padurueshme, por qytetarët kanë thënë ashtu. Në momentin që nuk është kryetari i komunës prezent këtu, jo rastësisht Ligji për vetëqeverisjen lokale e ka përcaktu nënkryetarin, dhe nënkryetari e mbulon atë fushë. Unë nuk e di, Majlinda, a ke mbetë ndonjëherë që ke shtrë pyetje dhe nuk ke marrë përgjigje.

z.Ekrem Abazi: Për mua personalisht është një iniciativë e mirë kjo që ka fillu. E përmendët që vjen në qeveri, por nuk ka lidhje, asnjë qeveri nuk e pengon komunën për punë të mira që i kryen, përkundrazi i përkrah. Unë e përkrah shumë mirë. Para 5–6 viteve kemi pengu dy herë stacionin e autobusëve me ju dhanë Gjilanit. Ka ardhë iniciativa e dytë, mes kryetarit të komunës së Gjilanit dhe komunës së Vitisë, dhe kemi arritë qëllimin me e pengu. Ndoshta atëherë u dok keq, por sot duket mirë, sepse sot stacionin e autobusëve e ka komuna e Gjilanit. Edhe këtë mandat që shkoj është pengu, d.m.th tri herë është pengu që mos me marrë stacionin e autobusëve Komuna e Gjilanit.

z.Bekim Azizi, kryesues i Kuvendit: Në Gjilan, stacioni i autobusëve është ndërmarrje komunale. D.m.th, stacioni i autobusëve në Viti është kërku me iu kalu ndërmarrjes komunale të Gjilanit për menaxhim, dhe kjo ka qenë kundërshtimi që kemi pasë. Kemi kërku që të jetë një ndërmarrje e komunës së Vitisë. Dhe sot ky është qëllimi, që kjo me hy në këtë menaxhim që jemi tu e kërku.

z.Ekrem Abazi: Dhe tjetra, e pashë mirëmbajtjen e varrezave dhe shërbimet e varrimit. Çka nënkupton kjo? Sepse ne në një mandat kemi marrë një vendim që edhe hapjen e varreve me e bë komuna. Ka qenë PDK në pushtet, por nuk është zbatuar kurrë. Dhe tash, çka keni parapa ju me shërbimet e varrimit dhe mirëmbajtjen e varrezave?

z.Arton Musliu, drejtor: Mua më vjen mirë që shumica e anëtarëve të Kuvendit Komunal janë të pajtimit për me vazhdu me procedurat për themelimin e ndërmarrjes publike lokale. Qëndrimet pro dhe kundër, jo kundër themelimit apo qëllimeve, janë shumë normale. Lidhur me Majlindën, ideja për themelimin e ndërmarrjes publike ka qenë e jona. E përmendi Majlinda, unë për vete nuk e kam ditë që ka qenë në plan-programin e Lëvizjes Vetëvendosje, për besë nuk e kam ditë. Te qëndrueshmëria financiare, unë veç e përmenda: kemi raste konkrete të funksionimit të qëndrueshëm financiar të ndërmarrjeve publike lokale në Kosovë, dhe kjo nuk mundet me qenë përjashtim. Lista e aseteve dhe hapësirave publike që do të menaxhohen nga ndërmarrja publike lokale e keni përpara, dhe të gjitha këto gjenerojnë të hyra. Veç me i marrë e me i kalkulu të hyrat që gjenerohen nga mbledhja e mbeturinave në Komunën e Vitisë, del një shifër e

konsiderueshme e akumulimit të hyrave për qëndrueshmërinë financiare të komunës. Kjo është shumë lehtë e verifikueshme. Te qëllimi, po vendosen disa pikëpyetje rreth qëllimit. Unë po të siguroj që ne si ekzekutiv qëllimin e kemi të mirë. Qëllimi është me ju ofru qytetarëve të Vitisë shërbime më të mira se ata që kanë aktualisht. Sa kemi me mujtë, varet prej shumë faktorëve, por konceptualisht jemi në rrugën e duhur që kjo ndërmarrje publike, në momentin që funksionalizohet, me qenë në shërbim të qytetarëve. Liridona, the që e pranova që me çështjen e mbeturinave jemi keq. Kqyre, edhe komunat që udhëhiqen prej Vetëvendosjes nuk janë më mirë. Merri e analizo, i ke raportet zyrtare të Ministrisë së Mjedisit. Mënyra më e mirë për me i vlerësu gjërat është duke i krahasu, nuk mundemi me u krahasu me vetveten. Qytetarët e Vitisë janë qytetarë që prodhojnë mbeturina për kokë banori ndër më së shumti në krejt Kosovën. Kjo është një faktor i rëndësishëm pse ka më shumë mbeturina në Viti, Gjilan, Mitrovicë e Lipjan sesa në komuna tjera, sepse qytetarët e këtyre komunave gjenerojnë mbi 1 kilogram mbeturina për kokë banori, ndërsa shumica kanë 0.7, ne e kemi mbi 1 kg. Arsyeja e dytë është funksionimi jo i mirë i Ekohigjienës apo i kompanive për grumbullimin dhe trajtimin e mbeturinave. Tash ne kemi gjetë një situatë ku Ekohigjiena nuk ka qenë shumë e kujdesshme në raport me këtë problem, dhe bashkë me ekzekutivin, kryetarin dhe disa këshilltarë komunal kemi shty këtë çështje në nivel tjetër. Kemi rritë bashkëpunimin me Ekohigjienën dhe mund t'ju them që pas këtyre aksioneve numri i familjeve të regjistruara për trajtim dhe grumbullim të mbeturinave është rritë, diku mbi 300 regjistrime të reja vetëm gjatë këtij muaji. The që dokumenti është i shkurtër. Liridona, vendimet janë prej dokumenteve të shkurtra. Gjeje një vendim që i ka 100 faqe, nuk ka. E para. E dyta, po të sfidoj: gjeje një vendim më të gjatë dhe më konciz se ky vendim prej krejt komunave që i kanë themelu ndërmarrjet publike. Asnjë vendim i ndërmarrjeve publike të themelume që janë iniciu prej kuvendeve komunale nuk është më i gjatë se ky, sepse siç tha edhe kryesuesi i kuvendit, ky është vetëm vendim për nisjen e procedurave. Më vonë bëhet plani i biznesit, qëndrueshmëria financiare dhe të tjera, të cilat unë vetë nuk muj me i bë, por duhet me u bë një grup punues bashkë me zyrtarë të komunës dhe ekspertë të fushës. Edhe te shërbimet e varrimit, po, ndërmarrja publike lokale parasheh edhe mbulimin e shërbimeve të varrimit.

z.Bekim Azizi, kryesues i Kuvendit: Unë edhe më herët thashë, këto çështje kanë me ardhë të gjitha, sepse themelues është Kuvendi. Të gjitha këto kanë me ardhë, kanë me u formu grupet punuese, kanë me u trajtu dhe kanë me u punu me diskutime publike. Të gjitha kanë me qenë.

zn.Liridona Bislimi: Drejtor, faleminderit shumë për elaborimin e diskutimit. Unë nuk është që kam bërë analizë për komuna tjera, sa i përket materialeve që kanë ardhë. Unë kam bërë analizë me materialet tona që i kemi pasë paraprakisht, për kalimin e një rruge prej privat në publik. Kemi pasë material shumë voluminoz, po e zë si shembull, sepse kohëve të fundit jemi tu pasë shumë materiale të tilla dhe u bazova në atë që pata me diskutu, dhe e përfundova. Nuk dashta me bë replikë, por nënkryetar, po më vjen shumë keq se mënyra e diskutimit si po e bën, kur e dëgjojnë qytetarët, duket sikur me të vërtetë është ashtu. Ma së pari, forma cinike dhe ofenduese, thuase ne nuk jemi tu e ditë se çka është tu ndodhë në komunën e Vitisë. Tash jam tu hy në vitin e 9 të nivelit të qeverisjes lokale, dhe puna ime si këshilltare komunale është me u marrë me angazhimet e nivelit ekzekutiv, duke fillu sidomos prej të parit të Vitisë. Në Klan Kosova e ke videon me titull “Vitia nuk ka nevojë për pastrim”, nisë kështu video, “dalim për aksion, por banorët e komunës së Vitisë nuk kanë shumë mbeturina për t’u pastru”, qeshtu niset video. Çka tash unë ndryshe prej kësaj që ke këtu? Bile çka është më interesant që ka ndodhë para 7 viteve, gazetari paska thanë se janë të ndaluara ndërtimet në zonën afër lumit Morava.

z.Elham Emërllahu: Ne shumica e asamblastëve e përkrahim si ide dhe urojmë që të shkojë deri në fund. U tha që ka qenë ide e jona, por unë nuk e di, sepse të paktën kandidatin tonë për kryetar komune nuk e kam dëgjuar ndonjëherë në fushata. Këta të Vetëvendosjes thanë “na e paske marrë idenë”, ti the që ka qenë ide e jona. Tash nëse është ide momentale që e ke pru, po. Unë për këtë e kam dëgju veç Labinot Bislimin në fushatë. Ta marrim seriozisht këtë punë. Unë e kam diskutu edhe në seancën kur kanë ardhë shpenzimet e vitit 2025. Dmth janë mijëra, për mos me thënë qindra mijëra euro të shpenzuara nga komuna për mirëmbajtje të hapësirave dhe shërbimeve publike. Dmth rëndësia është e madhe edhe mundësia për me kriju është e gjatë, e vështirë, e rëndë, duhen shumë procedura, shumë rregullore, shumë ligje me i përputh mes vete. Uroj që ne ta

përfundojmë të gjithë së bashku. Me dhanë ide nuk është keq, veç duhet me u dëgju. Unë e di që keni numrin në Kuvend Komunal, mundeni me i bë krejt, po ju ka dhënë mundësia drejtorit të shërbimeve publike. Muaji prill gjithmonë është muaji i pastrimit dhe ishalla nuk mbesim, sepse drejtori i shërbimeve publike dhe drejtori i urbanizmit na kanë "bombardu" me fotografi në këtë kohë. Por mos të harrojmë se edhe viteve të kaluara komuna e Vitisë muajin prill gjithmonë e ka pasë muaj të pastrimit, e ishalla nuk mbesim vetëm te pastrimi.

z.Bekim Azizi, kryesues i Kuvendit: Janë disa data që mundet edhe me u qitë fotografi, por menaxhimi i mbeturinave është i përditshëm dhe gjithmonë është i kushtueshëm. Gjithçka që bëhet, që ndërtohet, që vihet në funksion, më shtrejt kushton mirëmbajtja sesa ndërtimi.

z.Basri Aliu: Ne vetëm dolëm prej rendit të ditës me njëfarë forme, se u diskutua edhe për menaxhim të mbeturinave. Për idenë kush e ka dhënë për me formu këtë kompani: ideja e di që ka qenë diku edhe në 2011, po është problemi që nuk ka pasë aspekt ligjor. Andaj, dhe iniciativa që merret tash, ju kemi afru kontratës që kemi me "Ekohigjenën" në 2027, dhe tash ka mundësi me u kriju një kompani, që me qenë të gatshëm që në 2027 me marrë kompania për menaxhimin e mbeturinave. U përmend se Komuna e Vitisë ka mbeturina shumë. E vërtetë është që ka mbeturina, po në krahasim me komunat tjera, Komuna e Vitisë është me standard më të lartë – mundeni me i pa edhe e Komunën e Ferizajt etj. Po nuk do të thotë që ne nuk duhet me punu në këtë drejtim, që sa më shumë të eliminojmë këto dukuri, por tu u nisë prej vetvetes, prej secilit këshilltar komunal, sepse secili kemi ndikimin diku për me kriju ambient sa më të pastërt. "Ekohigjena" i kryen punët e veta që i ka, ndërsa aty ku nuk janë deponitë e përcaktueme për me i hudhë mbeturinat, "Ekohigjena" nuk i kryen, dhe kështu që na mbeten neve për me i kry.

z.Bekim Azizi, kryesues i Kuvendit: Duhet me ditë që Ekohigjiena është për mbeturinat e amvisërisë, mos t'i përziejme nganjëherë kompetencat. Ekohigjiena nuk është komunale dhe i ka specifikat prej qeverisë që janë të përcaktuara. Mirëpo, ku nuk kanë kompetenca ata, ne duhet me ndërmarrë masa si komunë dhe me i menaxhu. Ju falënderoj për debatin dhe diskutimin. Kisha kërku që ta votoni këtë pikë, pra me të gjitha votat pro, pa asnjë votë kundër dhe asnjë abstenim miratohet kjo pikë.

Si pikë e katër të rendit të ditës kemi:

4. Propozim për shqyrtimin dhe miratimin e propozim vendimit për ndarjen e parcelës kadastrale të pronës komunale

z.Hasan Aliu, nënkryetar i Komunës: E keni propozim vendimin para jush. Unë nuk do të lexoj përveç propozim-vendimit. E keni dokumentacionin komplet: propozimin për ndarjen e parcelës nga gjeometri i licencuar, e keni edhe certifikatën dhe komplet dosjen. E keni edhe mendimin e Drejtorisë së Urbanizimit, si dhe kërkesën e personit në fjalë, Nikoll Jakovi. Besoj që lënda është e kompletuar. Materialin e keni marrë me kohë. Çështja është për ndarjen e një prone që është pronë komunale, për me u kategorizuar si rrugë. Prandaj është në vlerësimin e juaj që sot ta shqyrtoni dhe me shpresë ta miratoni.

z.Bekim Azizi, kryesues i Kuvendit: Më saktësisht, pjesa që është te ndërtesa e IPKO-s, ajo me xhama, ajo pjesa në mes të dy ndërtesave. Ka bërë pronari kërkesë që me u prish IPKO-ja, me u lëshu prona komunale dhe me u bë rrugë ajo pjesë që e lidh atë parcelë. Dokumentacionin e kanë pru drejtorit përkatës. Hapet debati për këtë pikë.

z.Basri Aliu: Ne si grup i LDK-së, pasi që është interes i popullatës me u hapë hapësira dhe me pasë dalje, po edhe mos me i pengu investitorët që janë aty, e përkrahim këtë iniciativë dhe jemi pro.

z.Remzi Salihu: Unë deshta me pyet rreth ndërtesës: çfarë statusi ka kjo ndërtesë, kush është pronar i saj, edhe çfarë statusi ka, a është pronë private dhe a është ndërtesa e legalizuar?

z.Hasan Aliu nënkryetar i komunës: Unë besoj se si pronë është pronë private, kur flasim për ndërtesën e IPKO-s, atë me xhama. Ndërsa a ka leje ndërtimi apo nuk ka, këtë nuk e di, nuk i kam dokumentacionet. Vetëm e di që në atë kohë gjykata ia ka njohë të drejtën e pronësisë. Ndërsa a është legalizuar apo jo, këtë nuk e di.

z.Remzi Salihu: Kjo me siguri do të hyjë me ndonjë marrëveshje për prishjen ose mosprishjen e saj. Nëse nuk është e legalizuar, atëherë pse me marrë ndonjë përgjegjësi komuna me e kompensu? E pash që nuk ka kompensim, por nganjëherë gjërat bëhen, masanej, pasi të kryhet puna, kërkohet kompensimi.

z.Bekim Azizi, kryesues i Kuvendit: Pasi që nuk ka të tjerë për diskutim, e qes në votim: a jeni që të kalojë kjo pikë e rendit të ditës? Me 14 pro, 0 kundër, 5 abstenim, miratohet kjo pikë e rendit të ditës.

Si pikë e pestë e rendit të ditës kemi:

5. Propozim për shqyrtimin dhe miratimin e propozim vendimit për transferin (Rialokimin) e mjeteve buxhetore në programin buxhetor në kategorinë ekonomike të investimeve kapitale

z.Berat Zuka, zyrtar financiar: Përshëndetje të nderuar të pranishëm. Kemi një propozim-vendim për transferin e dy fondeve burimore, nga fondi burimor grant qeveritar dhe nga fondi burimor të hyrat vetanake. Mjetet e dy projekteve do të barten, ose do të rialokohen, në projektin e ndërtimit të tribunave të stadiumit në Pozharan, kodi i projektit 54884. Shuma prej 10 mijë euro nga granti qeveritar dhe 10 mijë euro nga të hyrat vetanake, si dhe dy projekte të tjera të njëjta nga fondi burimor të hyrat vetanake, do të barten në këtë projekt. Kjo nënkupton që gjithsej 40 mijë euro barten për ndërtimin e tribunave të stadiumit në fshatin Pozharan. Këto projekte janë në listën e buxhetit të Republikës së Kosovës, të miratuara me buxhetin e vitit të kaluar për vitin 2026. Kërkohej që projekti i ndërtimit të tribunave të stadiumit të fshatit Pozharan të kompletohet me mjetet e nevojshme për fillimin e procedurave të prokurimit.

z.Basri Aliu: Ne këtë kemi diskutu edhe në KPF dhe, duke pasë parasysh se çrregullimi i sistemit buxhetor ka ndodh për disa efekte tjera, Thesari po i tërheq mjetet dhe po mbesin kodet buxhetore pa mjete. Pasi që është interes i ndërtimit të stadiumit të Pozharanit, dhe duke qenë se ka qenë obligim ndoshta edhe i Ministrisë së Kulturës, por duke pasë parasysh që ata nuk po intervenojnë në këtë drejtim, atëherë ne e përkrahim këtë iniciativë që ky projekt të përfundojë.

z.Elham Emerllahu: Po më vjen mirë që edhe në seancën e kaluar kemi pasë një diskutim bashkë me drejtorin për kulturë, rini dhe sport, si shqetësim për kushtet në të cilat zhvillohen ndeshjet dhe për tribunat në stadiumin e Pozharanit. Edhe mua më vjen mirë që ky ndryshim po vjen sot, që ai projekt me u realizu.

z.Illir Zuka: Një pikë jashtëzakonisht e mirë për Pozharanin, për komunën e Vitisë, për Vllazninë e Pozharanit që është duke i mbrojtë ngjyrat e gjithë qytetarëve të komunës së Vitisë, që është e nevojshme. Uroj që kjo punë të nisë me procedura të përsheptuara dhe të bëhet një tribunë, sepse në gjendjen që është stadiumi është keq. Ne kemi bërë punë të mirë në zhveshtore dhe në fushë, por sot mundemi me thanë që është njëri ndër stadiumet e vetme në Kosovë që nuk e ka tribunën. Kështu që falënderoj Komunën e Vitisë që e ka parë të arsyeshme me e pru këtë projekt dhe uroj që të kryhet sa më shpejt.

znj.Majlinda Shabani: Edhe ne si grup i Vetëvendosjes, çdo iniciativë që shkon në interes të qytetarëve, sidomos në investime kapitale për të cilat ka nevojë, i mbështesim këto iniciativa dhe shpresojmë që këto mjete që kanë me u ridestinu me shku për ato projekte dhe me u realizu.

z.Bekim Azizi, kryesues i Kuvendit: Pasi që nuk ka të tjerë për diskutim, e qes në votim: a jeni që të kalojë kjo pikë e rendit të ditës? Pra, me të gjitha votat pro, pa asnjë votë kundër dhe asnjë abstenim, miratohet kjo pikë e rendit të ditës.

Si pikë e gjashtë e rendit të ditës kemi:

6. Propozim për shqyrtimin dhe miratimin e propozim vendimit për kthimin e mjeteve buxhetore në kategorinë ekonomike të investimeve kapitale

z.Hasan Aliu, nënkryetar i Komunës: Para jush keni një propozim-vendim të natyrës së njëjtë, por për punë të ndryshme, jo si ai i pari, për shkak se këtu kemi një propozim-vendim për ndryshimin e kategorive ekonomike të investimeve. Kemi një obligim ndaj DEMOS-it në shumën prej 105 mijë euro. Prandaj, obligimet të cilat i kemi duhet t'i kryejmë, edhe pse kemi pasë me i krye në vitin 2025. Megjithatë, nga përmbaruesit na janë marrë njëherë, dhe tash është dashtë me i marrë nëpër kode tjera në formë që me i kompletu, në mënyrë që në raport me DEMOS-in mos me leju çështjen e ekzekutimit nga ana e përmbaruesve privat. Obligimi jonë ndaj DEMOS-it është diku 105 mijë euro.

z.Bekim Azizi, kryesues i Kuvendit: Obligimi ndaj DEMOS-it është për shkak të grantit që ka përfituar komuna nga DEMOS-i dhe për shkak që punët kanë qenë në përfundim dhe kanë qenë afatet e caktuara. Mjetet në kodin buxhetor janë marrë nga vendimet e gjykatave, dhe tash ato mjete që kanë shku për vendime të

gjykatave kanë mbetë borxh, sepse DEMOS-i nuk është pagu. Kam pasë takime, kërkesa dhe e-maila të shpeshta që në të ardhmen mos me i humbë grantet nga DEMOS-i, për shkak se komuna ka qenë bashkëpunuese dhe është përfituese e DEMOS-it në shumë vite me radhë.

z.Basri Aliu: E përkrahim këtë iniciativë, sepse donatorët duhet t'i ruajmë e jo t'i largojmë. Prandaj e kemi obligim edhe si Kuvend edhe si qeveri që obligimet ndaj donatorëve të kryhen. Andaj, për këtë nuk kemi shumë çka me diskutu, sepse obligimin e kemi ne, ndërsa ata i kanë kryer obligimet e veta. Edhe pa dashjen tonë, mjetet e tyre janë shfrytëzuar për qëllime të tjera nga Thesari, dhe ne duhet ta kryejmë obligimin ndaj donatorëve dhe të jemi serioz në këtë drejtim. Kështu që ne si grup parlamentar i LDK-së jemi pro kësaj pike.

z.Bekim Azizi, kryesues i Kuvendit: Pasi që nuk ka për debat: a jeni që të miratohet edhe kjo pikë? Pra, me të gjitha votat pro, pa asnjë votë kundër, asnjë abstenim miratohet edhe kjo pikë.

Si pikë e shtatë e rendit të ditës:

7. Propozim vendim për dhenje në shfrytëzim të pronës së palujtshme të komunës së kompanis kosovare për distribuim me energji elektrike SHAAK në Viti për vendosjen e trafave elektrike

z.Bekim Azizi, kryesues i Kuvendit: Kjo pikë është diskutuar në fillim kur e kemi futur në rend të ditës. Zakonisht është praktikë, sidomos kur është për trafo për KEDS-in, dmth në të gjitha mandatet i kemi kaluar si procedura, sepse vetëm i kemi lehtësuar procedurat për qytetarët. Pra, pasi që nuk ka debat, a jeni që të kalojë kjo pikë? Me të gjitha votat pro, pa asnjë votë kundër dhe asnjë abstenim, miratohet edhe kjo pikë e rendit të ditës.

Si pikë e tetë e rendit të ditës:

8. Pyetje dhe përgjigje

z.Ilir Zuka: Kam një falënderim për drejtorin e shërbimeve publike, sepse pas 6 muajsh ndriçimi publik në Pozharan është lëshuar, pasi kemi pasë probleme në rrugën kryesore. Po ajo që kemi hasë aty është që shumë drita janë të dëmtuara; besoj që edhe aty do të intervenohet dhe do të rregullohen. Po ashtu kam pasë një kërkesë: një deponi e mbeturinave ka qenë në Pozharan, në rrugën "Sabit Zuka". Më është premtu që do të merret me atë punë bashkë me Ekohigjienën dhe do të largohet prej aty, por ende nuk është largu, prandaj është mirë me u intervenu. Një pyetje për drejtorin e shëndetësisë: drejtor, ndriçimet brenda ambulantës në QKMF në Pozharan kanë probleme dhe ka problem edhe me qentë endacakë. Kërkoj me ndërmarr diçka, sepse gjendja është shumë e keqe.

zn.Liridona Bislimi: Sa i përket pyetjeve dhe kërkesave nga qytetarët, i nderuar nënkryetar, unë kam vetëm një çështje që dua ta diskutoj dhe shpresoj që ky fjalim mos me përfundu vetëm si diskutim formal, pasi tema të cilën po e ngre është vërtet një shqetësim serioz institucional. Duke u bazuar në faktin që të njëjtin shqetësim e kam ngritë diku para një viti, është fjala për punëtorët e Gjendjes Civile në Komunën e Vitisë. Siç e përmenda, e kam ngritë të njëjtin shqetësim edhe vitin e kaluar sa i përket uljes së koeficientit të pagesës së tyre, dhe më vjen keq që fatkeqësisht po më duhet me e përsëritë prapë. Sepse nga 16 dhjetor 2024 e deri më sot kanë kaluar mbi 16 muaj pa asnjë vendim për këtë çështje. Dmth, kur ata e kanë dorëzuar këtë kërkesë te kryetari i komunës, i nderuar nënkryetar, sinjerisht këta punëtorë janë degradu në mënyrë të padrejtë nga profesioni 3 në profesionalin 2, e cila për qytetarët e komunës së Vitisë duhet me u sqaru që nënkupton ulje page, ulje dinjiteti dhe nënvlerësim të drejtpërdrejtë të punës së tyre. Dhe kjo nuk ka mujtë me ndodhë rastësisht, për shkak se këtu dihet që është mungesë e neglizhencës, mosveprimit dhe mungesë e vullnetit për me e zbatu ligjin. Sepse ligji e thotë qartë, katalogu i pagave është i qartë, detyrimet janë të qarta. Duhet me kuptu, nënkryetar, e kam pasë përmend edhe herën e kaluar gjatë diskutimit, dhe prap po e përsëris: po flasim për një numër mbi 50 punëtorë, mbi 50 familje, të cilave kjo pagë që janë duke e marrë tash nuk u shërben as për me i kry kërkesat për nevojat elementare. Dhe Gjendja Civile nuk është një zyrë e zakonshme, është hyrja e administratës, aty ku qytetari përballet çdo ditë me shërbime themelore. Dhe sot, pikërisht këto shërbime themelore, këta shërbyes civilë po trajtohen sikur me qenë punëtorët e dorës së fundit. Me keqardhje po e përsëris këtë shqetësim, për të cilin ka kaluar më shumë se një vit dhe ende nuk është marrë asnjë veprim nga ana juaj. Dhe unë sot po flas në emër të

tyre dhe prapë po ju kërkoj: korrigjimin urgjent të koeficientëve sipas ligjit dhe trajtim të barabartë për punëtorët e Gjendjes Civile.

znj.Elsa Jahija: Duke u bazuar në shqetësimet dhe kërkesat e drejtpërdrejta të banorëve dhe Këshillit të Fshatit Dobërdol, të cilët kanë kontribuar në mënyrë të jashtëzakonshme me punë vullnetare dhe mjete vetanake në realizimin e projektit që përfshin vendosjen e shkronjave të UÇK-së dhe krijimin e një kompleksi me përmbajtje rekreative-sportive, i cili pritet të përurohet më 14 qershor, si dhe duke pasur parasysh se kjo zonë është e paraparë si zonë turistike në Planin Zhvillimor Komunal, do të ishte me rëndësi për banorët e fshatit dhe për të gjithë qytetarët të dihet nëse Komuna ka planifikuar apo parasheh të ofrojë mbështetje konkrete institucionale në këtë fazë të përfundimit të projektit, veçanërisht në aspektin infrastrukturor, në mënyrë që ky projekt i ndërtuar me përkushtim të madh qytetar të finalizohet me standarde të duhura, të zhvillohet në përputhje me potencialin që ka dhe të shndërrohet në një pikë referimi për zhvillimin lokal. Në përmbyllje, duke pasur parasysh vlerën simbolike që bartin këto shkronja për historinë dhe identitetin tonë, si dhe përkushtimin e jashtëzakonshëm të banorëve në realizimin e projektit, vlerësoj që ky investim duhet të marrë mbështetjen e merituar institucionale. Përkrahja e komunës në këtë fazë do të ishte jo vetëm një vlerësim i drejtë për këtë iniciativë qytetare, por edhe një hap konkret drejt fuqizimit të një projekti që kontribuon drejtpërdrejt në zhvillimin lokal, promovimin e zonës si destinacion turistik dhe në të mirën e përgjithshme të komunës.

znj.Majlinda Shabani: Së pari dua të ndërlidhem me çështjen e hartave zonale. Besoj që ka qenë një temë që ka bërë një bujë të madhe për mënyrën se si është zhvillu i tërë procesi. Dhe unë e di që tash e një vit ne veç se kemi mbajtur një punëtori ku kemi qenë edhe ne si pjesë e opozitës. Dua të pyes: çka është tu ndodh me ato harta zonale, a janë finalizu apo nuk janë finalizu? Sepse është një vit që ka shku dhe procesi është tu marrë kohë, dhe gati ka arritur afati i ligjshmërisë së tyre. Prandaj dua një sqarim se çka është tu ndodh me hartat zonale. Pyetja tjetër ka të bëjë me transportin publik. E kam si pyetje dhe si shqetësim për drejtorin, por besoj që, nënkryetar, mundesh me u përgjigj edhe ti. Po du me e ngrit si çështje, sepse transporti publik besoj është njëra prej shqetësimeve që çdo qytetar i komunës së Vitisë e ka, sidomos ato fshatra dhe lagje që janë më në periferi. Dua me pyet a është mendu ndonjëherë prej komunës rreth transportit publik dhe përfshirjes së fshatrave në transport. Gjithashtu edhe me drejtoreshën e arsimit kisha pyet: transporti i nxënësve në shkolla qysh është i rregulluar dhe a ka mundësi me u përfshi apo me u bë diçka në këtë drejtim. Ne e patëm pikën e parë ku u diskutua për pasqyra financiare dhe u pa që janë tu u shpenzu mijëra e miliona euro në kode buxhetore, dhe kjo është një nevojë bazike që duhet me e pas secila lagje dhe secili qytetar. E di që ndoshta vyn kohë për me u implementu, por është diçka që duhet me u nisë dhe me u mendu më seriozisht në këtë drejtim. Pyetja tjetër për shërbimet publike: në seancën paraprake i kam adresu disa shqetësime që i kam pasë edhe me prishjen e asfalteve në disa vende në regjionin përreth Vitisë, dhe ende nuk është intervenu në ato vende ku ka prishje. Rruga që shkon direkt prej Vitisë për në Pozharan ka gropa shumë të mëdha që duhet me u intervenu. Gjithashtu kam bërë kërkesë edhe rreth disa deponive ilegale, ku njëra është aktuale në fshatin Lubishtë, afër rrugës “Qëndresa”. Ajo rrugë frekuentohet prej nxënësve, aty është xhamia dhe shkolla, dhe është kriju një deponi shumë e madhe. Mendoj që duhet me u intervenu urgjentisht. Drejtori më ka thënë që kanë me shku me e pa gjendjen.

z.Nuhi Ramadani: Përshëndetje për të gjithë të pranishmit. Sot ngre një shqetësim serioz të banorëve të fshatit Verban, me hapjen e rrugës që lidhë Begracën me fshatin Verban, Goshic. Është kriju një korridor i rrezikshëm për automjetet që kalojnë aty pari. Kjo rrugë po përdoret gjithnjë e më shumë nga fshatrat Verban, Begrac, Goshic, Smirë dhe anasjelltas, si pasojë është rritë ndjeshëm rreziku për këmbësorët, sidomos nxënësit e shkollës. Banorët ndihen të rrezikuar dhe kërkojnë ndërmarrjen e masave për rritjen e sigurisë rrugore, si vendosja e shenjave orientuese, kufizimi i shpejtësisë, rregullimi i trotuareve dhe ndriçimi i rrugës. Është detyrë e përbashkët e jona që t’i sigurojmë lëvizje të sigurt qytetarëve, veçanërisht fëmijëve.

z.Lulzim Haxhiu: Përshëndetje për të gjithë të pranishmit. Kam një pyetje për nënkryetarin lidhur me faturën e pagesave të kartelave. Në mbledhjen e kaluar është thënë që për sot do të sillen edhe fatura prej 500 eurove që i jepet Shoqatës së Familjeve të Dëshmorëve.

z.Hajdin Ademi: Përshëndetje për të gjithë të pranishmit. Kam një kërkesë prej një lagjeje të fshatit Skifteraj, lagjja Shabiu, e cila ka bërë kërkesë për shtrimin e rrugës me asfalt. Është kërkesë e kahmotshme dhe deri më tani nuk është ndërmarrë asnjë veprim. A ka mundësi dhe a do të ketë shtrim të asfaltit në këtë rrugë?

z.Ekrem Abazi: Unë nuk kam pyetje, por kërkesa. Kërkesa e parë është në lidhje me banimin social. Një ditë e pash që qeveria, për ata që kanë hapësirë me ndërtu banesë për banim social, të gjitha shpenzimet i paguan komuna, po i nevojitet vetëm me caktu vendin se ku. Prandaj kisha kërku që të caktohet një hapësirë, në mënyrë që me fillu procedurat për banim social. Kërkesa e dytë është asfaltimi i rrugicave. Neve na duket punë e thjeshtë, ka rrugica me metra jo shumë të gjata, por prej atyre rrugicave gjithmonë asfalti po del i dëmtuar dhe po zhytet. Nuk besoj që shkojnë shumë mjete financiare, po kryhet një punë e madhe, sepse qytetarët edhe kalojnë vetë dhe me vetura, dhe kur po dalin në asfaltin kryesor, krejt po zhytet asfalti.

z.Remzi Salihu: Unë pata dy pyetje për drejtorin e Shërbimeve Publike, por pasi që drejtori nuk është këtu, kërkoj që të m'i sjellë me shkrim në seancën e ardhshme. E para: çka është ndërmarrë për sanimin e gjendjes së kanalizimit në fshatin Remnik, pikërisht në lagjen Sejdiaj, kur dihet që për këtë problem kam qenë duke e ngritë këtu në Kuvend prej tre vitesh. Plus, edhe familjarët e kanë ngritë këtë çështje në organet përgjegjëse në komunë. E dyta: çfarë plani ka për sanimin e deponive në gjithë territorin e Komunës së Vitisë? Dhe diçka dua me e theksu: për këtë çështje ne si grup i VV-së e kemi kundërshtu që pika për pyetje dhe përgjigje të mos jetë në fund të seancës, sepse tash edhe unë kam punë dhe vetëm për këtë kam prit me i bë këto pyetje, plus kam pasë edhe vizitë te mjeku.

z.Elham Emërllahu: Përshëndetje për të gjithë të pranishmit. Dua ta ngre si shqetësim, ose si temë, që unë personalisht kam një përvojë bukur të gjatë në arsim. E nderuar drejtoreshë, do të doja që Drejtoria e Arsimit si njëra prej dikastereve kryesore në ekzekutiv të ishte më aktive në kuptimin e përgjegjësi dhe detyrave institucionale, në përputhje me ligjin për arsimin fillor dhe të mesëm. Përgjegjësia për organizimin e arsimit është e DKA-së. Meqë jam nga fusha dhe jam përballë, si të gjithë kolegët e tjerë në arsim, me sfidat dhe problemet që e preokupojnë arsimin në komunën e Vitisë dhe në nivel vendi, por ne po flasim për komunën tonë, është shqetësim i përgjithshëm që ka qenë dhe është aktual. Është hera e parë që po e diskutoj dhe kisha pasë dëshirë me debatuar sinqerisht me drejtoreshën, nënkryetarin dhe të gjithë akterët, se a ka ndonjë ide apo propozim DKA-ja dhe ekzekutivi për me u marrë pak më shumë me arsimin dhe me hartu një strategji bashkë me të gjithë neve këtu që jemi profesionistë, asambleistë, profesorë dhe mësimdhënës. Komuna e Vitisë ka kuadro të jashtëzakonshëm që mund të japin kontribut të madh në hartimin e politikave të mira për arsim. Tjetra, jemi dëshmitarë të gjithë të rënies së madhe të numrit të nxënësve. Kam marrë statistika prej vitit 2015 dhe janë statistika të tmerrshme të rënies së numrit të nxënësve. Kjo është shqetësim për të gjithë, nuk është vetëm për komunën tonë, por çuditërisht komuna jonë është ndër komunat me rënie më të madhe të nxënësve në nivel vendi; më duket vetëm Kamenica është para nesh. Me këtë pasojë duhet të gjithë të përballemi. Po e shoh edhe raportin e investimeve që na e solle nënkryetar, dhe e di edhe vetë që në shkollën ku unë jam punëtor janë bërë investime në shkollë, palestra dhe fusha sportive, por shqetësimi në vazhdimësi që na ka përcjellë si mësimdhënës është mirëmbajtja: higjiena, sanitaret, mjetet e punës dhe kabinetet. Ka rreth 10 vite që në shkollat e komunës së Vitisë sikur nuk është bërë një strategji e mirëfilltë për digjitalizim të shkollave, tabela digjitale dhe kabinete funksionale, sepse kemi disa kabinete jo shumë funksionale. Jam këtu me mundësitë dhe kapacitetet e mia, bashkë me ju, me drejtoreshën dhe të gjithë akterët, që të paktën prej vitit shkollor 2026–2027 ta marrim pak më seriozisht këtë punë. Ka shumë vërejtje në mirëmbajtje, pastërti dhe higjienë. Unë shumë pak po e shoh drejtoreshën në vizita në shkollë. E pash para 2–3 ditësh bashkë me drejtoreshën e QKMF-së në imunizim, dhe kjo është shumë mirë, por ju kisha lutë që, meqë i kemi rregullu shkollat dhe ambientet rreth tyre janë relativisht të mira jashtë, brenda kemi probleme. Në fshatin Gërmov kam ankesa të jashtëzakonshme nga këshilli i prindërve dhe kolegët, sepse ka vetëm një punëtor mirëmbajtës. Ky vit ka qenë vit i rëndë për arsimin në Viti, sidomos për shkak të numrit të madh të orëve të humbura, mbi 7 mijë orë si rezultat i anulimit të konkurseve për zëvendësim të mësimdhënësve ose plotësim të mungesave në shkollë. Në Gërmov, tash e sa kohë, tre klasa nuk kanë mbajtur mësim në lëndën e gjeografisë, që është shqetësuese. Të gjitha këto që po i them, drejtoreshë dhe ekzekutiv, ju kisha lutë të ulemi dhe me u marrë seriozisht me këtë çështje, sepse nuk

kemi më atë numër nxënësish që kemi pasë në vitin 2010 e tutje; numri është përgjysmuar dhe ka hapësirë për me bë punë më të mira, sidomos në mirëmbajtje. Një tjetër çështje: mësimdhënësit kanë problem me fotokopje dhe pajisje elementare. Ne jemi të ngarkuar shumë me administratë, materiale dhe plane. Në disa shkolla nuk ka letër, nuk ka printera, nuk ka ngjyrë. Nuk do të kushtonte shumë për komunën e Vitisë me i siguru këto gjëra bazike, dhe me i pajisë shkollat me tabela digjitale dhe me i funksionalizu kabinetet, sidomos ato të teknologjisë. Prandaj ju kisha lutë miqësisht dhe kolegjisht të ulemi së bashku, sepse ju keni mandat deri në vitin 2030 si drejtoreshë e arsimit dhe ne duhet me u marrë seriozisht me këtë sektor. Edhe një problem tjetër: është kërku raportit shëndetësor ose certifikata për herë të parë për mësimdhënësit. Shumë mirë që është bërë kontrolli mjekësor, por më ka bërë përshtypje që një operator privat e ka kry më lirë këtë shërbim sesa QKMF-ja, edhe pse flasim për rreth 800 mësimdhënës në komunën e Vitisë. Për mua ka qenë e habitshme që një operator privat del më lirë se institucioni publik.

z.Bekim Azizi, kryesues i Kuvendit: Privati e cakton çmimin vetë, ndërsa QKMF-ja e ka të përcaktuar me rregullore për taksa, ngarkesa dhe gjoba. Për këtë arsye, ata nuk mund të bëjnë lëvizje të çmimeve. Konkurrenca e bën të vetën.

z.Halil Musliu, drejtor: Shqetësimi që patët është i drejtë dhe legjitim. Të njëjtin shqetësim e kanë përcjellë edhe punëtorët e QKMF-së, dhe unë e kam proceduar te drejtoria. Dje ekipi ka dalë në terren për evitimin e defektit, por defekti ka qenë i natyrës pak më të rëndë dhe do të trajtohet sot ose në ditët në vijim, derisa të sanohet. Sa i përket certifikatës shëndetësore, ajo është kërkesë e ministrisë dhe nuk është kompetencë e organeve komunale. Tash problemi është se ne nuk e dimë saktë cilat veprime shëndetësore duhet me u ndërmarrë, a kërkohen analiza apo çfarë saktësisht. Privati e ka më lehtë, sepse mund të lëshojë një letër blanko pa shumë kosto; e dimë si funksionojnë një pjesë e operatorëve privatë, por realisht nuk ka mundësi që privati me qenë më i lirë se institucioni publik. z. Elham Emerllahu: Nëse është blanko, DKA-ja nuk duhet me ia pranë mësimdhënësit.

z.Bekim Azizi, kryesues i Kuvendit: Megjithatë, institucionet, si private ashtu edhe shtetërore, janë të licencuara dhe, pa qenë të licencuara, nuk mund të lëshojnë dokumente.

z.Elham Emërllahu: Edhe ne, si kryesues, nëse na kërkohet si asambleistë me bë një certifikatë të tillë, duhet me shku në privat.

z.Bekim Azizi, kryesues i Kuvendit: Çdo institucion që është i licencuar nga institucionet e Republikës së Kosovës është valid, kudo që përdoret.

z.Valmir Sahiti, drejtor: Dhe një sqarim shtesë rreth Elhamit dhe çështjeve të stadiumit që i ka ngritë në seancën e kaluar: ajo që kam ngritë nuk ka qenë vetëm deklaram, por kanë qenë dy pika të rëndësishme të sportit, siç janë dy projekte: stadiumi i qytetit dhe tribunat te “Vllaznia” e Pozharanit, të cilat tashmë janë drejt zgjidhjes. Para dy ditëve, së bashku me kryetarin e komunës dhe mekanizmat tjerë relevantë, si dhe me përfaqësues të Federatës së Futbollit të Kosovës, e kemi vizitu stadiumin e qytetit. Kemi bërë të gjitha matjet dhe, brenda pak ditëve apo javëve, do të vazhdojnë procedurat tjera dhe fillimi i punimeve, me qëllim që të rikthehet njëherë e përgjithmonë stadiumi i qytetit në gjendje të gatshme për përdorim nga shkollat e futbollit dhe klubet e qytetit të Vitisë. Një lajm i mirë është që nga vjeshta edhe Klubi Futbollistik Vitia do të rikthehet në gara. I falënderoj të gjithë këshilltarët komunalë që e kanë aprovuar bartjen e mjeteve për alokimin e tyre në projektin e stadiumit të Pozharanit, dhe tashmë të dy këto projekte po futen drejt fazave përfundimtare.

zn.Zyrafete Rama, drejtoreshë: Përshëndetje për të gjithë të pranishmit. Rreth pyetjes së këshilltares Majlinda për hartat zonale: para dy javësh kemi marrë pëlqimin si drejtori prej VSM-së, ku jemi tash në fazën e dytë dhe jemi duke punuar në atë drejtim. Besoj që shumë shpejt kemi me marrë prapë lajmin tjetër, që do të fillojmë me shqyrtimet publike dhe do të vazhdojmë tutje. Për momentin jemi në fazën e dytë dhe më 8 maj jemi në Ministrinë e Mjedisit bashkë me zyrtarët, dhe besoj aty do të marrim informata se kur do të dalim në shqyrtime publike.

zn.Arta Ajeti, drejtoreshë: Përshëndetje për të gjithë të pranishmit. Janë drejtuar disa pyetje rreth Drejtorisë së Arsimit dhe bashkëndej me to. I nderuar z. Elham, jo vetëm në Komunën e Vitisë, por në të gjithë Republikën e Kosovës është rënia e numrit të nxënësve, e cila është mjaft shqetësuese si për ne ashtu edhe për komunat

tjera. Strategjia aktuale e arsimit 2022–2026 veç ka skaduar dhe tani është në vlerësim. Aktualisht kemi bërë planifikimin dhe jemi në fazën e grumbullimit të të dhënave, për të harmonizuar planifikimin tonë me strategjinë e re. Në Gërmov është e vërtetë që kemi vetëm një punëtor teknik, mirëpo siç e dini edhe Statuti i Komunës është në përfundim dhe për këtë arsye kryetari ka marrë vendim që të gjitha konkurset të anulohen deri në përfundimin e statutit. Për këtë arsye nuk është vetëm për punëtorin teknik, por pothuajse të gjitha konkurset janë anuluar. Sa i përket mësimdhënësve, ne i kemi harmonizuar thuajse të gjitha, dhe tani nuk kemi mungesa të mësimdhënësve. Është diskutuar çështja e mësimdhënësit të gjeografisë. Është e vërtetë që në Komunën e Vitisë kemi mungesë të disa kuadrove, kemi pasur mungesë në fizikë, kimi dhe gjeografi. Jemi detyruar që për një kohë që nxënësit të mos mbesin pa orë, të angazhojmë edhe student të vitit të 3 të fizikës me kontratë njëvjeçare, deri sa të përfundohet procedura dhe pastaj është ripërsëritur konkursi për zëvendësim. Ndërsa për gjeografi nuk kemi pasur kandidatë dhe as studentë që shkojnë në atë lëmi, gjë që është shqetësuese jo vetëm për tani por edhe për të ardhmen. Për fotokopjet dua të cek seriozisht: edhe pse prioritet i ipet Drejtorisë së Arsimit nga komuna, realisht për shkak të mungesës së buxhetit dhe marrjes së mjeteve nga përmbauesit, shumë projekte kanë mbetur në gjysmë. Edhe pse është mendu digjitalizimi i shkollave, sa i përket fotokopjeve ne kemi kontratë me AQP, mirëpo AQP nuk i ka përfshi objektet shkollore, dhe kështu kemi mundur vetëm me i furnizuar me tonerë, asgjë më shumë. E nderuara Majlinda e ngriti shqetësimin për transportin e nxënësve. Sa i përket përgjegjësive të Drejtorisë së Arsimit, ne zakonisht në korrik e shpallim konkursin dhe procesi shkon përmes procedurave të rregullta. Kemi linjat Letnicë, Stubëll dhe Podgorc, ndërsa Viti është mbi 2.5 km. Aty kemi obligim komunal, sidomos për shkollat fillore, me ua siguruar transportin. Vetëm këto dy linja i mbulojmë aktualisht, si dhe kemi një kombi për transportin e fëmijëve me aftësi të kufizuara, ku shpenzimet i mbulon komuna.

z.Hasan Aliu, nënkryetar i Komunës: Drejtor, mirë që ju bashkangjitet, po t'i lexoj pyetjet që kanë qenë rreth drejtorisë suaj. Ilir Zuka, ndriçimi publik është rregulluar, por janë edhe disa drita të thyera që janë në mungesë, si dhe çështja e deponisë në rrugën “Sabit Zuka” dhe ndriçimi publik tek ambulanta, brenda oborrit të ambulantës. Liridona, një prej shkaktarëve të marrjes së vendimit, ku unë kam qenë nënshkruar, nuk ka qenë kryetari, por një shkresë që e kam marrë nga ana e ministrisë, në të cilën kërkohej që, në përputhje me katalogun, të bëhej kategorizimi i vendeve të punës. Këtë e ka kërkuar njësia e personelit dhe, derisa të bëhet kjo çështje, unë kam marrë vendim që të mos dalë asnjë konkurs. Kjo lidhet pikërisht edhe me rregullimin e punëtorëve të gjendjes civile në Komunën e Vitisë. Kemi pasur gatishmëri, por aspekti procedural na ka penguar. Tash, së shpejti, do ta bëjmë miratimin e statutit; komisioni e ka në përfundim, dhe rregullorja lidhur me sistematizimin e vendeve të punës do të bëhet, bashkë me kategorizimin, dhe do të rregullohen të gjithë punëtorët që janë në komunë. Elsa, iniciativat që i kanë marrë, duke filluar prej Radivojeit e Skifterajt, kemi bërë përpjekje me qenë prezentë së paku në infrastrukturë, edhe pse nuk i kemi pasur të parapara, sepse janë projekte që kanë lindur më vonë. Unë besoj se, sikur projektet tjera që i kemi përkrahur, kemi me i përkrahur edhe këto, por nuk kemi pasur projekt të miratuar nga ana e kuvendit. Megjithatë, do ta shikojmë mundësinë e përkrahjes së tyre. Majlinda, te transporti publik, shumica e kompanive që operojnë tash janë kompani private dhe ne nuk kemi transport që menaxhohet nga komuna. Ata i përcaktojnë vijat në bazë të asaj që ua lejon ministria dhe në bazë të kërkesës që e dërgon inspektori i komunikacionit në Komunën e Vitisë. Prandaj, aty ku e shohin leverdinë shkojnë, e aty ku nuk e shohin nuk shkojnë. Unë e di që ka udhëtarë pak, për shkak se është normale ajo çështje. Një tjetër çështje, drejtor, është fillimi i mirëmbajtjes së rrugëve verore, për disa gropa në rrugën e Pozharanit, por edhe në të gjitha rrugët tjera ku ka nevojë me u ndërhy. Gjithashtu, lidhur me pyetjen e Rezmiut, është kërkuar të dihet nëse ka ndonjë plan për eliminimin e deponive ilegale. Nuhi, me inspektorin e komunikacionit do ta shikojmë këtë çështje. Ne kemi edhe një tender ku jemi duke i vendosur shenjat e komunikacionit, dhe do ta kemi parasysh edhe rrugën atje në Verbanc, që e kërkohej. Lul, të paskam mbetur borgj, por në seancën tjetër, ishalla, nuk harroj me t'i sjellë kartelat dhe faturat se sa kemi paguar deri tani. Hajdin, për lagjen Shabiu dhe asfaltimin e rrugës, unë besoj se të gjitha ato që kanë qenë të programuara, por edhe të premtuara, siç ju thashë edhe te pasqyrat financiare, është vështirë me i realizuar, qysh po i shoh trendet e obligimeve që i kemi dhe që po na lindin pothuajse çdo ditë. Për atë arsye nuk guxoj me thanë që ka me u shtrur këtë vit. Ekremi për çështjen e

banimit social, është mirë me caktu një vend. Për mua, deri tash, forma e banimit social që kemi pasur nuk ka bërë zgjidhje; jo që nuk ka bërë zgjidhje, por na ka shkaktuar edhe telashe tjera. Megjithatë, unë nuk jam kundër që, nëse është e nevojshme, të caktohet një lokacion dhe të ndërtohet edhe një objekt tjetër. Dhe një tjetër pyetje, drejtor: çka është ndërmarrë për zgjidhjen e problemit të kanalizimit në Remnik? Unë jam marrë shumë me këtë çështje. Me të thanë të drejtën, Remzi, më kanë rrejtë, e më vjen shumë rëndë me thanë a më ka mashtruar kompania, sepse kam insistuar që, kur ka qenë sezona dhe fusha ka qenë e liruar, të punohet aty. Me siguri i kam 20-30 thirrje me kompaninë që e ka pasur obligim me kry punën. Besoj që kompania që është për mirëmbajtje nuk mundet me e bërë zgjidhjen përfundimtare. Ti e din që kanë qenë shumë herë aty dhe, sipas të gjitha gjasave, një pjesë duhet me u bë ndërrim. Këtë e kemi futur edhe në projekt, por për shkak se erdhi vjeshta, nuk u realizua. Tash të shohim; unë besoj që kjo çështje, edhe nëse e kemi në projekt, nuk mundet me u kry derisa kulturat që janë mbjellë aty të mos hiqen. Elham, me të plotësu rreth certifikatave, se kam qenë në rrjedhë: është një realitet që ju e keni një sindikatë shumë aktive. Kanë qenë dhe kemi pasur mospajtime. Njëherë i kam pritun unë, e më vonë ka ardhur edhe kryetari. Kanë kërkuar një herë lirim të plotë të pagesës dhe unë ju kam thënë që është e pamundur, për shkak se caktimi i tarifës për certifikatat mjekësore është në harmoni me udhëzimin e Ministrisë së Shëndetësisë, i cili është aprovuar edhe në kuvend komunal. Sikur të ishte krejt nga ana e kuvendit komunal, ndoshta kishte mujtë me u bë një zbritje me një vendim të kuvendit komunal. Por, kur e merr prej udhëzimit administrativ dhe inkorporohet nga niveli qendror, nuk guxon me ndërhy fare. Ata kanë kërkuar që pagesën me ua bërë komuna, por unë kam thënë që kjo nuk bën, për shkak se pastaj bëhet laramani, sepse edhe punëtorët e gjendjes civile dhe shërbyesit publikë i kanë nxjerrë vetë certifikatat mjekësore. E di që kanë hasur në mirëkuptim me një kompani të licencuar, që ka të drejtë me lëshu certifikata dhe që ato janë valide, dhe ajo kompani ka bërë një zbritje për shkak të numrit të madh të punëtorëve.

z.Elham Emërllahu: Drejtoreshë, faleminderit. Nuk e pata veç për Gërmovën, por aty jam punëtor i asaj shkolle dhe e di më në detaje, prandaj edhe fola me përgjegjësi. Harrova me përmend sigurinë në shkollë, sidomos në fshatrat që frekuentojnë rrugët nacionale, të cilat nganjëherë janë me rrezikshmëri të lartë për nxënësit. Duhet me pasë ndoshta pak më shumë mbikëqyrje, si prej drejtorive të shkollave, ashtu edhe prej DKA-së dhe organeve të tjera. Siguria e nxënësve në shkollë dhe e mësimit është shumë e rëndësishme. Ne kemi pasë në Komunën e Vitisë, vitin e kaluar nëse nuk gaboj, raste kur edhe mësimit janë sulmuar prej prindërve. Kur e përmenda strategjinë, që paska skaduar dhe në vitin 2026 bëhet e reja, shpresoj që krejt këto që unë po i them, por edhe ekspertë të tjerë që mundemi me i angazhu, pse jo, me i ofru në atë strategji. Janë disa detaje që duken të vogla, por kanë shumë rëndësi. Nuk kemi më nevojë në Komunën e Vitisë, mesa unë e kam parë, me ndërtu shkollë të reja, por me investu më shumë në shkollat ekzistuese, sepse jashtë janë rregullu mirë, por brenda është tepër më me rëndësi. Është edhe një detaj i vogël, por tepër shqetësues, që ka rezultu se në Komunën e Vitisë mbi 90% e shkollave nuk kanë ujë të pijshëm. Domethënë, ne nuk kemi qenë në gjendje me siguri ujë të pijshëm, që në fakt kërkon vetëm disa pajisje.

z.Bekim Azizi, kryesues i Kuvendit: Përderisa i kanë nxjerrë certifikatat mjekësore 800 mësimit, sa kanë dalë prej tyre që nuk janë në gjendje me dhanë mësim? A ka të tillë? Se kjo çështje është e rëndësishme.

zn.Arta Ajeti, drejtoreshë: Shumicën e shkollave i kemi të siguruar me kamera, mirëpo për shkak të mungesës së buxhetit, në disa shkollë ka ngecje dhe një pjesë e kamerave nuk funksionojnë. Sa i përket ujit, në ato vende ku kemi ujësjellës, uji pihet dhe është i siguruar. Por në ato fshatra ku furnizohen me puse, drejtorët mund të marrin në barnatoret bujqësore klor-kapsula për pastrimin e ujit.

z.Elham Emërllahu: Drejtoreshë, unë jam i vetëdijshëm që nuk janë krejt përgjegjësitë tua dhe të komunës. E di edhe si po funksionon niveli qendror, Ministria e Arsimit. Ndoshta ajo duhet me qenë një sinkron i funksionimit për këto detaje që po i përmend prej Ministrisë së Arsimit e tutje, por po e shohim që atje nuk po funksionon si duhet dhe po shkatojnë probleme edhe në komunë.

Megjithatë, ne si komunë, si komunë më e vogël dhe me numrin në rënie të nxënësve, kemi mundësi që në të ardhmen, në kuadër të asaj strategjie, me i parapa këto mangësi dhe me i evitu.

zn.Arta Ajeti, drejtoreshë: z.Elham, me të thanë të drejtën, që një vit Ministria e Arsimit nuk na ka ftu në asnjë takim. Kemi dërgu shumë kërkesa atje, por nuk kemi marrë përgjigje. Sa i përket çështjes së vizitave në shkollë, nuk jam fort e Facebook-ut, mirëpo gjithmonë jam në terren.

z.Arton Musliu, drejtor: Drejtoria që unë drejtoj, për shkak të natyrës së punës, është vazhdimisht në terren. Punëtorët e pastrimit, mirëmbajtjes, operatorët ekonomikë që janë të ndërlidhur me mirëmbajtjen e rrugëve, hapësirave publike etj., janë çdo ditë në terren dhe bëjnë një punë të mirë. Shfrytëzoj rastin me i falënderu për punën e tyre, në shkëmbim të një page jo shumë të favorshme për ta. Sa i përket ndriçimit publik, ne tash e kemi kontratën për mirëmbajtje dhe punëtorët janë në terren. Numri i rasteve është i madh dhe duhet kohë derisa t'ju vijë radha të gjithëve. Për deponitë ilegale, prej se ka fillu punën ky ekzekutiv si drejtori e komunës, i kemi largu disa deponi në Radivojc, Pozheran, Viti, Sodovinë e Jerlive, Beguncë. Është e vërtetë që nuk kemi arritë me i largu të gjitha, sepse ka shumë, dhe kostoja nuk është e vogël. Kemi edhe një skajp në komunë që shpesh ka probleme teknike, por punët nuk i kemi ndalë. Gjithashtu, punëtorët e drejtorisë sonë vazhdimisht janë në terren për intervenime rreth kanalizimit dhe ujësjellësit. Kemi intervenu në Skifteraj, Radivojc etj., kryesisht në largimin e mbeturinave prej përrockave, prej të cilave ka pasur dhe ka rrezik dëmtimi të pronave të mbjella. Në Beguncë kemi intervenu tri herë, e në fshatra të tjera po ashtu, mirëpo kërkesat janë të mëdha dhe ato që i paraqitni janë të arsyeshme. Në Dobëlldeh ne i kemi premtu Demirit dhe banorëve të atij lokaliteti se kemi me e plotësu me zhavorr pjesën ku janë të vendosura shkronjat për UÇK, dhe kjo është veç çështje kohe. Sa i përket kanalizimit në Remnik, unë deri tani nuk kam pas asnjë kërkesë, qoftë zyrtare apo jozyrtare për me intervenu. Përndryshe, ne si drejtori e shërbimeve publike dhe si komunë jemi në dispozicion për me i kry këto punë që i kemi obligim me i realizu.

z.Remzi salihu: Pak një skjarim me ma dhënë the që nuk e ke pas si kërkes por megjithatë si drejtor je pergjeggjes për të gjitha këto prandaj kërkesa është që 3 vite së paku 4 herë e kam ngritë unë por ndoshta në realitet dhe 8 herë, kërksene ke atje edhe nga banoret e asaj lagje dhe kërksat e mia në kuvend dhe duhet ta shikoni se kur mund ta sajoni këtë gjendje.

z.Arton Musliu, drejtor: i nderuara, ana e paraqitjes së kërkesës është në rregull, nuk ka rëndësi si paraqitet. Unë, për shkak të korrektësisë, desha me tregu që nuk kam qenë në dijeni. Ti e din që kjo çështje nuk është kompetencë e komunës, por e Hidromoravës, që është kompani publike nën menaxhimin e Ministrisë së Ekonomisë, dmth adresimin duhet me bë aty. Mirëpo ne si komunë nuk është që nuk duam me marrë përgjegjësi, por duhet me i adresu krejt çështjet që janë nevoja të qytetarëve.

z.Hasan Aliu nënkryetar i komunës: Drejtor e kanë bërë, ne kemi pasë një kompani për mirëmbajtje të kanalizimeve, kanë dalë në vend të ngjarjes, nuk kanë mujtë me kry punën, ka dalë edhe Hidromorava, nuk ka mujtë me kry punë, dhe tash e tutje aty duhet me prek atë çështje me sanu me kanal të ri, sepse nuk kanë mujtë me e qelë.

z.Arton Musliu, drejtor: I nderuar, unë po e marrë për obligim këtë çështje me e adresu, e takoj edhe Hidromoravën edhe kompaninë që është e kontraktume prej komunës për me u marrë me çështjen e kanalizimeve, andaj nëse është e mundshme kemi me e zgjidhë, unë po e marrë obligim publik për ta.

z.Remzi salihu: Me Hidromoravën ndoshta ka mundësi vetëm me debatu, se unë nuk e di që kanalizimi në fshatin Remnik është nën sistemin e Hidromoravës.

z.Illir Zuka: Drejtor, para disa javëve ta kam bërë me inxhinierin, e din saktë vendin ku është. Nuk e di se ku ke intervenu, diku tjetër në Pozheran. Dua ta di vendin se ku është hjek ajo deponi dhe uroj që rrugën “Sabit Zuka” ta pastroni.

znj.Majlinda Shabani: Po ndërlidhem me përgjigjen që i dhanë rreth pyetjeve të mia. Sipas asaj që kuptova për hartat zonale, jemi në fillim, është akoma faza e dytë, dhe nuk po arrij me kuptu cila është arsyeja që është vonu kaq shumë. Po më duket shumë e paarsyeshme fakti që është zgjatë kaq shumë. Nuk është puna veç te ministria, nuk dua me hy në debate, sepse e dini që pikërisht në planin zhvillimor komunal dhe me hartat zonale, ajo çka është bë prej anës së komunës, mundem me thanë që është eksperimentu me njerëz të cilëve u kemi dhanë me punu atë plan, dhe është dashtë me u kthi e me fillu prej zeros. Kështu që po e shoh që është në fillim dhe nuk besoj që është e mirë për komunën, megjithatë po shpresoj që ka me përfundu sa më shpejt dhe siç duhet. Te transporti publik, e mora përgjigjen prej nënkryetarit, e kuptoj mënyrën se si funksionon transporti

privat, ku i konvenon me shku. Por unë e di që veç pak vullnet me pas prej anës së komunës, ky mundet me u rregullu përmes formave të subvencionimit. Është mirë me fillu me mendu këtë çështje, ka komuna që e kanë bërë, si p.sh. Obiliqi. Unë e kuptoj që rrethanat janë të ndryshme prej komune në komunë, por mundemi me rregullu. Te deponitë ilegale mora përgjigjen prej anës së drejtorit. E kemi pa edhe përmes mënyrës së punës që është duke e bërë drejtoria, që ka fillu një kampanjë si fushatë për mjedis të pastër dhe ambient. Por ajo që po e shoh unë, drejtor, nuk mjafton vetëm kjo. E di që duhet ndërgjegjësim qytetar për çështjen e mbeturinave, por te deponitë ilegale zakonisht çka bëhet prej anës së ekzekutivit është me shku e me pastru atë vend. Ndoshta nuk kalojnë 2-3 muaj dhe ai vend prap shndërrohet në deponi ilegale, dhe ky është problemi kryesor. Duhet me kriju mekanizma të qëndrueshëm që nuk përsëriten. Unë nuk e di a është shqiptu ndonjë gjobë për deponitë ilegale, sepse nëse nuk shqiptojmë gjoba, nëse nuk vendosen mënyra të vëzhgimit me kamera, përndryshe kjo ka me qenë problem që veç ka me shku tu u zgjatë. Me pastro sot, pas 2-3 muajve prap, nëse nuk ka gjoba nuk ka me pas ndërgjegjësim qytetar. Besoj që kjo është njëra ndër mënyrat që duhet me fillu. Nuk e mora përgjigjen rreth një deponie ilegale që ju kam kontakti për fshatin Lubisht, nuk e di a keni pas raste me shku, sepse është rrugë që nxënësit e frekuentojnë çdo ditë dhe është rruga “Qëndresa” që shkon te xhamia. Dua me ditë çka po implementohet në këtë rast për shtëpitë që nuk janë në sistem të mbeturinave, çka ndërmerr komuna.

zn.Liridona Bislimi: i nderuar nënkryetar, unë me qëllim pata vetëm një pikë diskutimi, për shkak se mendova që ka nevojë kjo çështje me u diskutu më shumë, për shkak se është problematikë shumë e thellë. Jemi tu folë për 16 muaj që kanë mbetë njerëzit me atë pagë të mjerë. Përmende që keni pasë shkresë prej ministrisë, dmth paska pasë njëfarë procedure. Unë po them që ligji është i qartë. Deshta me ditë a je interesu për këto 16 muaj me qyr mos ka ndonjë komunë tjetër të njëjtin problem e ndoshta e ka zgjidh sa kohë i ka marrë, se tash të njëjtën temë që po e ngriti brenda 1 viti kalendarik po marr përgjigjen e njëjtë.

z.Hasan Aliu nënkryetar i Komunës: Jam interesu jo për këto 16 muaj, por nja 20 takime kemi pas me ta, që ka qenë edhe shefi i tyre. Kam qenë te gjendja civile, kam mbajtur takim me ta, kam thirr edhe komisionin që është tu hartu rregulloren, dhe jemi dakordu që tash bëhet miratimi i statutit, rregullohet, bëhet klasifikimi i vendeve të punës dhe rregullohet kjo çështje.

zn.Liridona Bislimi: unë mesa kam ndegju fillimisht ka qenë diskutimi për 3 muaj me u kry kjo punë, tash ka kalu në 16 muajsh dhe po të duket ty që nuk është punë e madhe. Ndoshta është në rregull për shkak se paga e jonë hec dhe kalon, është krejt në rregull. Ndoshta mendon që bëhet rikthimi i mjeteve përmes proceseve të gjykatës, ajo është krejt tjetër temë që e përmendi kolegu Ilir. Ne po flasim për çështjen konkrete, njerëzit janë të lodhur.

z.Hasan Aliu nënkryetar i Komunës: Shkresë ju ka çu Burimeve Njerëzore që ka thënë bëje kategorizimin e vendeve të punës dhe unë kur e kam parë aty i kam ndalë dhe konkurset i kam qitë kusht, kam thënë urdhno bëji krejt këto detyra. Tash për kohë sakt nuk e di, se nuk ka datë, por janë në procedura.

z.Arton Musliu, drejtori: Ilir, ti në katun tënd nuk po e din ku janë heq mbeturinat, e qysh me ditë unë. Deponia ku është heq është te ura afër burimit të ujësjetillës, që 9 vite hiqet ajo deponi për çdo vit. Këtë vit është heq me 9 mars, problemi është që tash po mbushen prap. Për dallim prej disa fshatrave tjerë, unë i kam disa të dhëna zyrtare këtu: sa familje nëpër secilin fshat janë të regjistruar në Ekohigjien për me hudh mbeturinat në vend të autorizum. Pozherani është mirë, janë 755 shtëpi rezidente, 612 prej tyre janë të regjistruara, që i bie 81% (pa shtëpitë e mërgatës). Janë të dhëna zyrtare që i kam marrë prej Ekohigjienës dhe i kam krahasu me Agjencinë e Statistikave të Kosovës. Majlinda, unë pajtohem me mënyrën si po e shtron ti çështjen, por sa i përket aspektit ligjor, në bazë të Ligjit për Mjedisin dhe Ligjit për Mbeturina, secili qytetar nuk ka të drejtë me qitë mbeturina në vende të paautorizuara. Me ligj është e rregullume. Problemi është te implementimi i legjislacionit, këtu jemi tu çalu. Shumë mirë e përmende: ne kemi inspektoratin dhe kemi policinë që kanë mandat ligjor me i gjosit ata që hudhin mbeturina në vende të paautorizuara, por më duket që ma përpara duhet me gjosit policinë dhe inspektorin që i kemi, sesa qytetarët, për shkak se unë nuk jam i kënaqur as me inspektorin e mjedisit, as me policinë në raport me numrin e gjobave që duhet me i shqiptu. Përndryshe, ju kisha lutë krejtve si këshilltarë komunalë, që jeni edhe administratorë të fshatrave, p.sh. në Lubisht janë 204 shtëpi, veç 83 janë të regjistruara në Ekohigjienë, që i bie veç 40%. Ose p.sh. në Viti janë 1344 shtëpi, 685 kontenierë, që i bie rreth 50%. Pa e rregullu këtë raport mes numrit të shtëpive dhe numrit të kontenierëve, na

e kemi problem me siguru ambient të pastër dhe të sigurt, në atë objektiv për të cilin jemi nisë. Nuk është që tash është keq, por objektivin e kemi me e bë ma mirë. E nëse kishit mujtë me na ndihmu ju si përfaqësues të qytetarëve, pikë së pari që jeni, por edhe përfaqësues të fshatrave prej nga jeni, me rritë numrin e atyre që regjistrohen për me marrë kontenier, atëherë na kishit ndihmu shumë. Në Verban, për shembull, veç javën e kaluar janë regjistru 70 klientë të rinj në Ekohigjienë. Nuk po them që është veç meritë e jemja, kanë punu qytetarët, ka punu Nuhia me banorët dhe kemi arritë efekt. Nëse kishit mujtë me na ndihmu këtu, na si ekzekutiv ju kishim ditë për nder.

z.Ekrem Abazi: Edhe një kërkesë më shumë për juve që Viti për çdo ditë te ura këtu është bërë pengesë shumë e madhe me dalë nga ana e lumit te kalldermi. Kur të kalojsh me kerr aty me pak harxhime bëhet një punë e madhe, aty është veç mos-puna e juaj, se aty ish kry moti.

z.Bekim Azizi, kryesues i Kuvendit: Pasi që nuk kemi të tjerë për diskutim, faleminderit nga të gjithë për kontributin e dhënë në këtë seancë. Mirupafshim në seancën e radhës.

Mbledhja përfundoi me punë në ora 14:30 min

Procesmbajtësi:
Fatlum Demiri

Kryesuesi i Kuvendit Komunal:
Bekim Azizi
